

四庫全書

史部

欽定四庫全書

荒政叢書卷十上

湖廣布政司叅議俞森撰

社倉考

宋孝宗時趙汝愚知信州乞置社倉疏曰臣伏見州縣之間每遇水旱合行賑濟賑糶去處往往施惠止及城郭不及鄉村鄉村之人為生最苦有終日役役而不能致一錢者使幸而得錢則又一鄉之中富室無幾近者

數里遠者一二十里奔走告糶則已居後於是老稚愁
嘆始有避荒就熟輕去鄉井之意其間彊有力者又不
肯坐受其斃奪攘剽竊無所不至以陷於非辜城郭之
人率不致此故臣嘗謂城郭之患輕而易見鄉村之害
重而難知然而求所以施行之策則亦不過勸諭上戶
廣行出糶轉移常平義倉之米以賑之而已夫勸諭上
戶殆成虛文轉移米斛復多欺弊臣愚欲望聖慈遠采
隋唐社倉之制而去其損耗之絕之弊明詔有司將遂

州每年合納義倉米斛除五分依見行條法隨正稅就州縣送納外將五分於逐鄉置厰每歲輪差上戶兩名充社司掌管受納委本縣丞檢察其欺弊不如法者究治之使幸得連歲豐稔所在稍有儲蓄則鄉里晏然若有所恃雖遇歉歲姦宄之心無自生矣

甌寧縣有洞曰回源劇賊范汝為向曾竊據民性悍小遇饑饉羣起殺掠進士魏揆之謂民易動蓋緣艱食乃請常平倉米一千六百石以貸鄉民至冬而取遂置倉

於邑之長灘鋪自後每歲散斂如常民得以濟不復思
亂草寇遂息

陳龍正曰社倉之利一以活民一以弭盜非獨弭本
境之盜也且以清鄰寇焉文公賑粟於崇安而盜擒
於浦城魏揆之置社倉於長灘鋪而回源洞之悍民
以化俗吏見小小禍亂輒議用兵不知窮民之與奸
雄非可一例行誅伐也饑餓瀕死威不能戢惟惠澤
可以已之而方其饑餓即金錢猶無以解其急也必

粟乃可浦城盜距崇安僅二十里用粟六百斛遂安
吾民消彼盜兵威有此效乎即金錢有此速乎人疑
其收息十二有類青苗然事貴可久非輸息十年何
以使其後永不輸息且豪民乘饑取利凡貸粟者出
息恒十四五至價貴甚則又不許償本色估計時值
至冬以金酬蓋有賣冬粟三四石僅清宿逋一石者
社倉之法行則豪右不得施其不仁而細民之倍息
可省何必以暫收薄息為嫌哉如一邑若干鄉區每

鄉每區立一社倉誠為至計賢士大夫有安和鄉里之心不可不蚤議此但當躬先倡率以風動之而毋強之云耳

崇安社倉記

朱熹

乾道戊子春夏之交建人大饑予居

崇安之開耀鄉知縣事諸葛侯廷瑞以書來屬予及其鄉之耆艾左朝奉郎劉侯如愚曰民饑矣盍為勸豪民發藏粟下其直以賑之劉侯與予奉書從事里人方幸以不饑俄而盜發浦城距境不二十里人情大震藏粟

亦且竭劉侯與予憂之不知所出則以書請於縣於府
時敷文閣待制信安徐公嘉知府事即日命有司以船
粟六百斛泝溪以來劉侯與予率鄉人行四十里受之
黃亭步下歸籍民口大小仰食者若干人以次受粟民
得遂無饑亂以死無不悅喜歡呼聲動旁邑於是浦城
之盜無復隨和而束手就擒矣及秋徐公奉祠以去而
直敷文閣東陽王公淮繼之是冬有年民願以粟償官
貯里中民家將輦載以歸有司而王公曰歲有凶穰不

可前料後或艱食得無復有前日之勞其畱里中而上
其籍於府劉侯與予既奉教及明年夏又請於府曰山
谷細民無蓋藏之積新陳未接雖樂歲不免出倍稱之
息貸食豪右而官粟積於無用之地後將紅腐不復可
食願自今以往歲一斂散既以紓民之急又得易新以
藏俾願貸者出息什二又可以抑僥倖廣貯蓄即不欲
者勿強歲或不幸小饑則弛半息大侵則盡蠲之於以
惠活鰥寡塞禍亂源甚大惠也請著為例王公報皆施

行如章既而王公又去直龍圖閣儀真沈公度繼之劉侯與予又請曰粟若分貯民家於守視出納不便請仿古法為社倉以貯之不過出捐一歲之息宜可辦沈公從之且命以錢六萬助其役於是得籍黃氏廢地而鳩工度財焉經始於七年五月而成於八月為倉三亭一門牆守舍無一不具司會計董工役者貢士劉復劉得輿里人劉瑞也既成而劉侯之官江西幕府予又請曰復與得輿皆有力於是倉而劉侯之子將仕郎琦嘗佐

其父於此其族子右修職坪亦廉平有謀請得與并力
府以予言悉具書禮請焉四人者遂皆就事方且相與
講求倉之利病具為條約會丞相清源公出鎮茲土入
境問俗予與諸君因得具以所為條約者迎白于公公
以為便則為出教俾歸揭之楣間以示來者於是倉之
庶事細大有程可久而不壞矣予惟成周之制縣都皆
有委積以待凶荒而隋唐所謂社倉者亦近古之良法
也今皆廢矣獨常平義倉尚有古法之遺意然皆藏於

州縣所惠不過市井游惰輩至於深山長谷力穡遠輸之民則雖饑餓瀕死而不能及也又其為法太密使吏之避事畏法者視民之殍而不肯發往往全其封鑄遞相付授至或累數十年不一訾省一旦甚不獲已然後發之則已化為浮埃聚壤而不可食矣夫以國家愛民之深其慮豈不及此然而未之有改者豈不以里社不能皆有可任之人欲一聽其所為則懼其計私以害公欲謹其出入同於官府則鈎校靡密上下相遁其害又

必有甚於前所云者是以難之而弗暇耳今幸數公相繼其憂民慮遠之心皆出乎法令之外又皆不鄙吾人以為不足任故吾人得以及是數年之間左提右挈上說下教遂能為鄉閭立此無窮之計是豈吾力之獨能哉惟後之君子視其所遭之不易者如此無計私害公以取疑於上而上之人亦毋以小文拘之如數公之心焉則是倉之利夫豈止於一時其視而效之者亦將不止於一鄉而已也因書其本末如此刻之石以告後之

君子云

淳熙八年朱熹上社倉議曰臣所居建寧府崇安縣開
耀鄉有社倉一所係昨乾道四年鄉民艱食本府給到
常平米六百石委臣與本鄉土居朝奉郎劉如愚同共
賑貸至冬收到元米次年夏間本府復令依舊貸與人
戶冬間納還臣等申府措置每石量收息米二斗自後
逐年依此斂散或遇小歉即蠲其息之半大饑即盡蠲
之至今十有四年支息米造成倉廩三間收貯已將元

米六百石納還本府其見管三千一百石並是每年人戶納到息米已申本府照會將來依前歛散更不收息每石只收耗米三升係臣與本鄉土居官及士人數人同共掌管遇歛散時即申府差縣官一員監視出納以此之故一鄉四五十里之間雖遇凶年人不闕食竊謂其法可以推廣行之他處而法令無文人情難強妄意欲乞聖慈特依義役體例行下諸路州軍曉諭人戶有願依此置立社倉者州縣量支常平米斛責與本鄉出

等人戶主執歛散每石收息二斗仍差本鄉土居或寄居官員士人有行義者與本縣官同共出納收到息米十倍本米之數即送原米還官卻將息米歛散每石只收耗米三升其有富家情愿出米作本者亦從其便息米及數亦與撥還如有鄉土風俗不同者更許隨宜立約申官遵守實為久遠之利其不願置立去處官司不得抑勒則亦不至騷擾此在今日言之雖無所濟於目前之急然實公私儲蓄預備久遠之計及今歉歲施行

人心願從者衆其建寧府社倉見行事目謹錄一通進
呈伏望聖慈詳察特賜施行孝宗從其言徧下諸路做
行其法任從其便其斂散之事與本鄉耆老公共措置
州縣並不得干預抑勒

社倉事目

一逐年十二月分委諸縣社首保正副將舊保簿重
行編排其間有停藏逃軍及作過無行止之人隱
匿在內仰社首隊長覺察申報尉司追捉解縣根

究其引致之家亦乞一例斷罪次年三月內將所
排保簿赴鄉官交納鄉官點檢如有漏落及妄有
增添一戶一口不實即許人告審實申縣乞行根
治如無欺弊即將其簿組筭人口指定米數大人
若干小兒減半候支貸日將人戶請米狀核對批
填監官依狀支散

一逐年五月下旬新陳未接之際預於四月上旬申
府乞依例給貸仍乞選差本縣清強官一員人吏

一名斗子一名前來與鄉官同共支貸

一申府差官訖一面出榜排定日分分都支散

先遠後近

一日曉示人戶產錢六百元以上及自有營運衣食不缺不得請貸各依日

限具狀

狀內開說大小兒口數

結保

每十人結為一保遞相保委如保內逃亡之人

同保均備取保十人以下不成保不支

陳龍正曰不成保不支將聽畸零窮民之餓乎不如金華

縣規附甲為妥

正身赴倉請米仍仰社首保正副隊長大

保長並各赴倉識認面日照對保簿如無偽冒重

疊即與簽押保明

其社首保正等人不保而掌主保明者聽

其日監官

同鄉官入倉據狀依次支散其保明不實別有情
弊者許人告首隨事施行其餘即不得妄有邀阻
如人戶不願請貸亦不得妄有抑勒

一收支米用淳熙七年十二月本府給到新漆黑官
桶及官斗仰斗子依公平量其監官鄉官人從逐
廳只許兩人入中門其餘並在門外不得近前挨
拶攙奪人戶所請米斛如違許被擾人當廳告覆
重作施行

一豐年如遇人戶請貸官米即開兩倉存畱一倉若
遇饑歉則開第三倉專賑貸深山窮谷耕田之民
庶幾豐荒賑貸有節

一人戶所貸官米至冬納還

不得過十一月下旬

先於十月上

旬定日申府乞依例差官將帶吏斗前來公共受
納兩平交量舊例每石收耗米二斗今更不收上
件耗米又慮倉廩折閱無所從出每石量收三升
準備折閱及支吏斗等人飯米其米正行附厯收

支

一申府差官訖即一面出榜排定日分分都交納近先

後遠一仰社首隊長告報保頭保頭告報人戶日一都遍

相糾率造一色乾硬糙米具狀同保共為一狀未足不得交納如保

內有人逃亡即同保均備納足赴倉交納監官鄉官吏斗等人至

日赴倉受納不得妄有阻節及過數多取其餘並

依給米約束施行其收米人吏斗子要知首尾次年夏支貸日不可差換

一收支米訖逐日轉上本縣所給印曆事畢日具總

數申府縣照會

一每遇支散交納日本縣差到人吏一名斗子一名
社倉筭交司一名倉子兩名每名日支飯米一斗

約半

發遣裹足米二石共計米一十七石五斗又

貼書一名貼斗一名各日支飯米一斗

約半

發遣

裹足米六斗共計四石二斗縣官人從七名鄉官
人從共一十名每名日支飯米五升

日

共計米八

石五斗已上共計米三十石二斗一年收支兩次

共用米六十石四斗逐年蓋墻并買藁薦修補倉
廩約米九十石通計米六十九石四斗

陳龍正曰每人日支飯米一斗太多矣應減為一
升五合另給酒菜銀數分上下均便 張文嘉曰
支收交納各有定限為日不多在鄉官士人知此
義舉斷不計利至於吏人倉子安肯空勞每名支
飯米一斗即寓相犒之意若減為一升五合又給
酒菜之資不惟反多煩瑣抑恐不足服此輩之心

其鄉官并僕從恐有貧薄者亦必須支米五升方足薪水之用固知朱子非過厚也

又按朱子當日始創此事故須官府彈壓倘今舉行社倉則保簿赴官交納及申縣乞差吏斗諸事俱不必行止須支給司社及倉守効勞宣力諸人可也

一排保式某里第某都社首某人今同本都大保長隊長編排到都內人口數下項

甲戶 大人若干口小兒若干口居住地名某處
或產戶開說產錢若干或白烟耕田開店
買賣土著外來係
某年移來遂戶開

餘開

右某等今編排到都內人戶口數在前即無漏落
及增添一戶一口不實如招人戶陳首甘伏解縣

斷罪謹狀

年月日大保長姓名

隊長姓名

保正副姓名

社首姓名

一請米狀式某都第某保隊長某人大保長某人下
某處地名保頭某人等幾人今遞相保委就社倉
借米每大人若干小兒減半候冬收日備乾硬糙
米每石量收耗米三升前來送納保內一名走失
事故保內人情願均備取足不敢有違謹狀

年月日保頭姓名

甲戶姓名

大保長姓名

隊長姓名

保長姓名

社首姓名

一社倉支貸交收米斛合係社首保正副告報隊長
保長隊長保長告報人戶如闕隊長許人戶就社
倉陳說告報社首依公差補如闕社首即申尉司

定差

一簿書鎖鑰鄉官公共分掌其大項收支須監官簽押其餘零碎出納即委鄉官公共掌管務要均平不得徇私容情別生奸弊

一如遇豐年人戶不願請貸至七八月而產戶願請者聽

一倉內屋宇什物仰守倉人常切照管不得毀損及借出他用如有損失鄉官點檢勒守倉人備償如

些小損壞逐時修整大段改造臨時具因依申府
乞撥米斛

陸九淵曰社倉固為農之利然農田常熟則其利
可久苟非常熟之田一遇歉歲則有散而無斂來
歲缺種糧時乃無以賑之莫若兼置平糶一倉使
無貴賤之患折所糴為二每存其一以備歉歲代
社倉之匱實為長利也

陳龍正曰文公社倉之法利賴無窮其最要在不

願置立去處官司不得抑勒二語孝宗仁明詔任
從民便斂散之事州縣不得干預至矣哉社倉之
事蔑以加矣若必強民置立斂散由官即與荆公
青苗無異此經世之學最貴於圓通也 青苗者
田未熟而貸之錢田已熟而收其利安石嘗行此
於一邑甚善然猶體悉下情隨其願與不願也至
當國時欲以此行之天下而守令者又阿重臣意
旨以多散錢多得利為稱職不問貧富緩急強與

之又寄權人役出納之際輕重為姦而民遂怨咨
載道矣

金華潘氏社倉記 朱熹淳熙二年東萊呂伯恭自婺來
訪予於屏山之下觀於社倉發斂之政喟然歎曰此周
官委積之法隋唐義廩之制也吾將歸而屬諸鄉人士
友相與糾合而經營之使閭里有賑恤之儲而公家無
餽合之費不尤愈乎伯恭既歸不三年而卒遂不果為
其卒之年浙東果大饑予因得備數推擇奉行荒政按

行至婺則婺之人狼狽轉死已籍籍矣予因竊嘆以為向使伯恭之志得行必無今日之患既而尚書下予所奏社倉事諸道募民欲為者聽之民蓋多慕從者而未幾予亦罷歸又不果有所為也是時伯恭之門人潘君叔度感其事而深有意焉且念其家自先大夫時已務賑恤樂施予歲捐金帛不勝計矣而獨不及聞於此也於是慨然出粟五百斛為之斂散以時規畫詳備一都之人賴之而其積之厚而施之廣蓋未已也一日以書

來曰此吾父師之志予幸克成之然世俗不能不以為疑也子其可不為一言以解之乎予惟有生之類莫非同體惟君子為能無有我之私以害之故其愛人利物之心為無窮特窮而在下則禹稷之事有非其分之所得為者然苟以其家之有餘而推之以與鄰里鄉黨則固吾聖人之所許而未有害於不出其位之戒也況叔度之為此特因其墳廬之所在而近及乎十保之間以承先志以悅親心以順師指而何不可之有哉抑凡世

俗之所以病乎此者不過以王氏之青苗為說耳以予
觀於前賢之論而以今日之事驗之則青苗者其立法
之本意固未為不善也但其給之也以金而不以穀其
處之也以縣而不以鄉其職之也以官吏而不以鄉人
士君子其行之也以聚斂亟疾而無慘怛忠厚之心是
以王氏能行於一邑而不能行於天下子程子嘗極論
之而卒不免於悔其已甚而有激也婺人蓋多叔度同
門之士必有能觀於叔度所為之善而無疑於青苗之

說者則庶乎其有以廣夫君師之澤而使環地千里永無捐瘠之民矣豈不又甚美哉叔度名景憲與伯恭同年進士年又長而屈首受學於伯恭無難色師没守其說不懈益虔於書無所不讀蓋深有志於當世然以天資峭直自度不能隨世俯仰故自中年不復求仕而獨於

此為拳拳也

倉在婺女鄉安期里

顏光衷曰凡害民之政其始盡言利民上開一孔下開百竇城郭富豪之家猶能夫吾乃若山谷僻陋矇

叟孤稚目不識文告耳不辨官音舌不解數陳手不能訴寫見里長則面色青黃望公門則心戰膽慄稍有桀驁皆得望風索騙幻弄吞侵其為凌虐寧可數計每見上人撫循至意不得已而為此策孜孜丁寧惟恐有失然予權任事則情勢不能無假借而假借之下復有假借則侵漁之外復肆侵漁於是告訐日煩獄訟日滋罪罟日長愁怨日盈而太平之風索然盡矣

金華社倉規約

計十四款

一社倉穀本五百石

一社倉只置總簿一面紙盡置第二面

一一甲不許過三十人甲頭一人不滿十人附甲不許

詭名冒籍

犯者出社甲頭改替許同
甲告罰甲頭所納絡賞

一散穀以三時

謂除夜或下田接
新並須甲頭相度

一每戶借一石甲頭倍之無居止及有藝人不借

若口
累衆

多作田廣甲頭
保明別議增借

一借穀上簿不立契

還記就簿勾銷

卷十一

一借穀日每戶納錢五十文甲頭免

十五文給甲頭十文守倉人十文雜

夫十五文掌倉量錢此外不許分文乞索許甲內人告以所得錢文給賞

陳龍正曰此法免息後猶可行若出息二斗又見納五十文太重矣

張文嘉曰不若每石止令納白銀三分彙收一處俟完日共計銀若干作五十股派開照法分給各項人亦酌中之道

一量穀本甲甲頭執槩

並見清量掌倉人擅執槩改替

一還以三限限以三日

謂如十甲每甲若干人一限納若干並甲頭預報定日子一人

不到甲內穀並
畱倉候齊交量

一息穀二分

謂石取
息二斗

中饑減半大饑盡免本戶納息已

滿十年免收息

謂第一年納
至十一年免

一耗穀三釐

謂穀一石取耗三升以備
折閱及充每歲社倉雜費

一甲內逃亡甲頭同甲內均填甲頭倍之

若係時疫戶
絕甲頭申倉

差人審實候還穀日銷落
若不循理者雖已還出社

一息穀有餘遇饑荒給散

計所有每人大人二升小兒一升十日止並以入籍戶口

為定

一社衆於規約犯一事不借一年再犯出籍

清江縣社倉規約五款

一所借給貴均平亦慮失陷米本其支借時鄉官審問
社首及甲內人某人可借若干衆以為可方可支借
其素號游手及雖農業而衆以為懶惰頑慢者亦不
支貸

一鄉官踏逐善書寫百姓一人

不得用罷役過犯人

專充書寫簿

書如收支執槩就差社首遇收支日日支飯米一斗

一倉中事務並委鄉官掌管但差使保正編排人戶磨

對簿歷彈歷斂散踏逐倉廩追斷逋負之類須官司

行遣

張文嘉曰惟梗化敗度者用官司行遣可也

一鄉官從本軍給帖及有朱記主執行遣

一簿用紙札每歲於息內支破

建寧府建陽縣長灘社倉記 朱熹建陽之南里曰招賢者三地接順昌甌寧之境其陋多阻而俗尤勁悍往歲兵亂之餘稂莠不盡去小遇饑饉輒復相挺羣起肆暴率不數歲一發雖尋即夷滅無噍類然愿民良族晷刻之間已不勝其驚擾矣紹興某年歲適大稔姦民處處羣聚飲博嘯呼若將以踵前事者里中大怖里之名士魏君元履為言於常平使者袁侯復一得米若干斛以貸於是物情大安姦計自折及秋將歛元履又為請得

築倉長灘廩置之旁以便輸者且為後日凶荒之備毋
數以煩有司自是歲小不登即以告而發之如是數年
三里之人始得飽食安居以免於震擾夷滅之禍而公
私遠近無不陰受其賜蓋元履少好學有大志自為布
衣而其所以及人者已如此蒙其惠者雖知其然而未
必知其所以然也其後元履既沒官吏之職其事者不
能勤勞恭恪如元履之為於是粟腐於倉而民饑於室
或將發之則上下請賕為費已不貲矣官吏來往又不

以時而出內之際陰欺顯奪無弊不有大抵人之所得
糶糠居半而償以精鑿計其候伺亡失諸費往往有過
倍者是以貸者病焉而良民凜凜於凶歲猶前日也淳
熙十一年使者宋侯若水聞其事且知邑人宣教郎周
君明仲之賢即以元履之事移書屬之且下本臺所被
某年某月某日制書使得奉以從事蓋歲以夏貸而冬
歛之且收其息什之二焉行之三年而三里之間人情
復安如元履亡恙時什二之收歲以益廣周君既以增

葺其棟宇又將稍振其餘以漸及於旁近蓋其惠之所
及且將日增月衍而未知其所極也周君以予嘗有力
於此者來請文以為記予與元履早同師門遊好甚篤
既追感其陳迹又嘉周君之能繼其事而終有成也乃
不辭而為之說如此則又念昔元履既為是役而予亦
為之於崇安其規模大畧倣元履獨歲貸收息為小異
元履常病予不當祖荆舒聚斂之餘謀而予亦每憂元
履之粟久儲速腐惠既狹而將不久也講論餘日盃酒

從容時以相訾訾而訖不能以相訕聽者從旁抵掌觀笑而亦不能決其孰為是非也及是宋侯周君乃卒用予所請事以成元履之志而其效果如此於是論者遂以予言為得然不知元履之言雖疏而其忠厚懇惻之意藹然有三代王政之餘風豈予一時苟以便事之說所能及哉當時之爭蓋予之所以為戲而後日之請所以必曰息有年數以免者則猶然不忘吾友之遺教也因并書之以視後人使於元履當日之心有以得之則

於宋侯周君今日之法有以守而不壞矣元履名揆之嘗以布衣召見天子悅其對即日除太學錄尋以數論事不得久居中既而天子思復召用之則元履既卒矣上為悵然久之詔有司特贈直祕閣云

建寧府建陽縣大闡社倉記 朱熹 招賢里大闡羅漢院之社倉新侯官大夫周君某之所為而長灘之別貯也始祕閣魏君之築倉於長灘非擇其地而處之也因其船粟之委於是而藏焉耳故倉之所在極里之東北而

距西南之境遠或若干里貸者多不便之而是時率常數歲乃一往來則猶未甚以為苦也淳熙甲辰周君始以常平使者宋公之檄司其發歛之政而以歲貸收息之令從事既為之更定要東搜剔蠹弊而以時頒焉民已悅於受賜矣周君因益問以用革之宜而有以道里不均之說告者且曰自今以往一步而往來者再則其勞佚之相絕又非前日比矣周君於是白之宋公而更為此倉以適遠近之中且令西南境之受粟者即而輸

焉來歲遂以遠近分土使各集於其所以待命民既歲
得飽食而又無獨遠甚勞之患於是咸德周君而相率
來請文以記其成昔予讀周禮旅師遺人之官觀其頒
斂之疏數委積之遠邇所以為之制數者甚詳且密未
嘗不嘆古之聖人既竭心思而繼之以不忍人之政其
不可及乃如此及今而以是倉之役觀之則彼其詳且
密者亦安知其不有待於歷時之久得人之多而後乃
至於此耶因為之記其本末以為後之君子或將有考

於斯焉周君字居晦好讀書有志當世之務吏事亦精敏絕人不但此為可書也

邵武軍光澤縣社倉記 朱熹 光澤縣社倉者縣大夫毗

陵張侯訢之所為也光澤於邵武諸邑最小而僻自張侯之始至則已病夫市里之間民無蓋藏每及春夏之交則常糴貴而食艱也又病夫中下之家當產子者力不能舉而至或棄殺之也又病夫行旅之涉吾境者一有疾病則無所於歸而或死於道路也方以其事就邑

之隱君子李君呂而謀焉適會連帥趙公亦下崇安建陽社倉之法於屬縣於是張侯乃與李君議略倣其意作為此倉而節縮經營得他用之餘則市米千二百斛以充入之夏則損價而糶以平市估冬則增價而糶以備來歲又買民田若干畝籍僧田民田當沒入者若干畝歲收米合三百斛并入於倉以助民之舉子者如帥司法既又附倉列屋四楹以待道途之疾病者使皆有以棲託飲食而無暴露迫逐之苦蓋其創立規模提挈

綱領皆張侯之功而其條畫精明綜理纖密者則李君之力也邑人既蒙其利而歌舞之部使者亦聞其事而加勸獎焉於是張侯樂其志之有成而思有以告來者使勿壞則以書來請記予讀古人之書觀古人之政其所以施於鰥寡孤獨困窮無告之人者至詳悉矣去古既遠法令徒設而莫與行之則為吏者賦斂誅求之外亦飽食而嬉耳何暇此之問哉若張侯者自其先君子而學於安定先生之門則已悼古道之不行而抱遺經

以痛哭矣及其聞孫遂傳素業以施有政宜其志慮之
及此而能委心求助以底於有成也李君於予蓋有講
學之舊予每竊歎其負經事綜物之才以老而無所遇
也今乃特因張侯之舉而得以粗見其毫末是不亦有
感乎故予既書張侯之事而又附以予之所感於李君
者來者尚有考云

常州宜興縣社倉記

朱熹

始予居建之崇安嘗以民饑

請於郡守徐公喜得米六百斛以貸而因為社倉今

幾三十年矣其積至五千斛而歲斂散之里中遂無凶
年中間蒙恩召對輒以上聞詔施行之而諸道莫有應
者獨閩帥趙公汝愚使者宋公若水為能廣其法於數
縣然亦不能遠也紹興五年春常州宜興大夫高君商
老實始為之於其縣善卷開寶諸鄉凡為倉者十一合
之為米二千五百有餘斛擇邑人之賢者承議郎趙君
善石周君林承直郎周君世德以下二十有餘人以典
司之而以書來屬予記予心許之而未及為也會是歲

浙西水旱常州民饑尤劇流殍滿道顧宜興獨得下熟而貸之所及者猶有賴焉然予猶慮夫貸者之不能償而高君之惠將有所窮也明年春高君將受代以去乃復與趙周諸君皆以書來趣予文且言去歲之冬民負米以輸者襁負爭先視貸籍無倫合之不入予於是益喜高君之惠將得以久於其民又喜其民之信愛其上而不忍欺也則為之計其所以然者抑又慮其久而不能無弊於其間也則又因而告之曰有治人無治法此

雖老生之常談然其實不可易之至論也夫先王之世使民三年耕者必有一年之蓄故積之三十年則有十年之蓄而民不病於凶饑此可謂萬世之良法矣其次則漢之所謂常平者今固行之其法亦未嘗不善也然考之於古則三登太平之世蓋不常有而驗之於今則常平者獨其法令簿書筦鑰之僅存耳是何也蓋無人以守之則法為徒法而不能以自行也而況於所謂社倉者聚可食之物於鄉井荒閑之處而主之不以任職

之吏馭之不以流徒之刑苟非常得聰明仁愛之令如
高君又得忠信明察之士如今日之數公者相與併心
一力以謹其出納而杜其姦欺則其法之難守不待異
日而見之也此又予之所身試者故并書之以告後之
君子云

建昌軍南城縣吳氏社倉記

朱熹

乾道四年建人大饑

熹請於官始作社倉於崇安縣之開耀鄉使貧民歲以
中夏受粟於倉冬則加息什二以償歲小不收則弛其

息之半大侵則盡弛之期以數年子什其母則惠足以廣而息可遂捐以予民矣行之累年人以為便淳熙辛丑熹以使事入奏因得條上其說而孝宗皇帝幸不以為不可即頒其法於四方且詔民有慕從者聽而官府毋或與焉德意甚厚而吏惰不恭不能奉承以布於下是以至今幾二十年而江浙近郡田野之民猶有不與知者其能慕而從者僅可以一二數也是時南城貢士包揚方客里中適得尚書所下報可之符以歸而其學

徒同縣吳伸與其弟倫見之獨有感焉經度久之乃克
有就遂以紹熙甲寅之歲發其私穀四千斛者以應詔
旨而大為屋以貯之蒞事有堂燕息有齋前引兩廊對
列六庾外為重門以嚴出納其為條約蓋因崇安之舊
而加詳密焉即以其年散斂如法鄉之隱民有所仰食
無復死徙變亂之虞咸以德於吳氏而伸與倫不敢當
也則謹謝曰是倉之立君師之教祖考之澤而鄉鄰之
助也吾何力之有哉且今雖幸及於有成而吾子孫之

賢否不可知異時脫有不能如今日之志以失信於鄉人者則願一二父兄為我教之教之一再而不能從則已非復吾子孫矣蓋亦相與言之有司請正其罪庶其懼而有改其亦可也於是衆益咨嗟嘆息其賢以為不可及而包君以書來道其語且遣倫及伸之子來請記熹方病不能文然嘉其意不忍拒也乃為之書其本末既以警夫吳氏之子孫使其數世之後猶有以知其前人之意如此而不忍壞抑使世之力能為而不肯為者

有所羞愧勉慕而興起焉則亦所以廣先帝之盛德於無窮而又以少致孤臣泣血號弓之慕也

俞森曰觀朱子社倉諸記及各規約法可謂備矣然變通亦顧其人隨其時地之宜而用之有未可執一者按黃震通判廣德軍時社倉法大弊衆以始自朱熹不敢議震曰法出於聖人猶有變通安有先儒為法遂不得救其弊耶為別買田六百畝以其祖代社倉息非凶年不得輒貸貸不取息此可謂善法朱子

者也

毛鼎新黃巖人授浙西提舉茶鹽司準遣改常平司準
遣其長有欲獻羨餘四十萬者鼎新力爭以置社倉陳
善曰鼎新此舉不啟君上之侈心而於民有德且俾其
長免言利干進之咎一舉而三善具焉附 乾德四年詔
出納之吝謂之有司倘規致於羨餘必深務於掊克知
光化軍張全操上言三司令諸處倉場主吏有羨餘粟
及萬石芻五萬束以上者上其名請行賞典此苟非倍

納民租私減軍食何以致之宜追寢其事勿頒行除官
所定正耗外嚴加止絕

陳芳生曰錢穀出納積少成多不無餘潤為民牧者
特患無實心耳苟有實心以行實政何利不可興建
哉浙江運司席某居官清介自正供外力却火耗等
事去任時庫中尚存羨餘五千吏請曰此可取也席
曰獨非百姓膏血耶卒不受嗚呼席氏誠不可及矣
然亦獨為君子耳以天地間有用之物置之無用之

地徒飽鼠竊狗偷者之腹不大可惜耶大約司權司鹽
司倉羨餘極多雖甚清介亦有饒溢有志斯民何利
不舉故特表而出之以為賢士大夫告

元張光大議曰古有義倉又有社倉義倉立於州縣社
倉立於鄉都皆民間積儲以待凶荒者也國朝酌古準
今立義倉於鄉都一舉兼盡社倉之設惠至渥也今附
近稅戶各以差等出穀為本每年收息穀一斗候本息
相停以穀本給還元主以利為本立掌倉循環規運豐

年貯積凶年出貸有司許令點檢而不許干預侵借其立法最為詳備惠民之意亦甚切至未及十年倉庾充斥過於本倍然百姓困於義倉民間但見其害而不見其利凶年饑歲而民不免於流離死亡其故何也良由有司任法而不任人法出而奸生令行而弊起以暴心行仁政政無非暴雖曰惠民實所以厲之也畧而舉之其弊有四一曰掌倉之弊今之掌倉者非革闕之吏貼祇候則鄉里無藉之潑皮請託行求公納賄賂投充是

役上以苟避差役下以侵削小民既已過費重貲寧不
貪圖厚利官司容其奸偽百姓不敢誰何二曰點檢之
弊其有考滿守缺司吏官員門下親知或結託求差或
倚勢分付帶領僕從名為計點義倉糧盤繞鄉村呼集
社伍需求酒食索取齋發贖其欲則抄寫虛數忤其意
則苛細百端遂科斂社民糶賣義穀以為祇待起發前
者既去後者復來所積之糧十去其七三曰出貸之弊
掌倉素非仁德忠厚之士所儲之穀平時先已侵用至

於出貸之際預行插和糠粃秬穀砂土及至支遣小斗
慳量比及到家簸揚所貸不得一半豐年有米則勒令
民戶承貸凶荒之歲則推稱已貸盡絕惟務肥已不恤
濟人虛裝人戶具報官司或立詭名交割下次民之受
害其何可言四曰回收之弊百姓貸穀未及半年為之
掌倉者既交割前界貸數乃集不逞之徒三五為羣遍
繞鄉村催索逋貸叫囂隳突需求酒食何所不為及至
人戶擔穀到倉一斗必收二斗幹人脚穀上數科陪滿

斗豪量不奪不饜稍涉分析則云以後官司計點虧折誰賠若或不從必是解官懲治民之困於義倉有甚於凶荒之歲者醫瘡剜肉誰不惻然有此四弊而欲惠濟於民未之有也又有虛申案驗偽指倉困觀其數則億萬有餘考其實則百千不足官司視為文具姦吏因緣為私故自立義倉以來展轉繁文州縣徒有幾千萬石之名饑荒之歲民不沾惠是蓋有司不以荒政為心但為黷貨之具委任失當以暴心行之本既不澄弊端滋

蔓耳由是而言則擇人委任為第一要事若委任得人亦不須差人計點出納之公自然無弊然君子作事謀始任人之方尤所當慎若一槩委用產稅富豪之家則富而好義者少為富不仁者多中間未免結構所司侵漁剝剝其害有甚於吏胥無籍之輩今後莫若選擇鄉里有德望誠信謹愿好義之人或賢良縉紳素行忠厚廉介之士不拘產稅抵業但為衆所敬而悅服者許令鄉民推舉不必拘以鄉都所司察其行實以禮敦請使

之掌管置簿供報依時出納不限年月交替至如出貸之時入水和穀小斗慳支回收之際大斗滿量及需索糜費圖利倍取人戶者但有陳告得實依不枉法例追斷移易虛樁坐以侵盜之罪徵取還倉如此則掌倉者知所警懼保守廉恥而不妄為貧者必沾其實惠矣雖然言之非艱行之惟艱必也州縣杜其夤緣求充之源於其前禁其不時計點之弊於其次至於出貸回收之際絕其供報文案之需彼既無所費於官司則下自可

安而行之源清流潔上下皆可以誠心為民有其誠斯
有其實庶幾義倉儲積不為虛設凶年饑歲得以濟民
上不負朝廷立法為民之美意儻若上無公論下有叛
心前弊不除純任以法雖有善者亦無如之何也已

明張朝瑞圖書編社倉議 社倉之制乃古人良法特
患上之人不知所以倡之耳有父母斯民之責者果知
民為邦本食為民天水旱之凶荒不時官倉之積穀有
限思為備荒之善策須酌社倉之事宜乃計之得也合

於各保甲鄉約中各創立社倉先捐俸金以為倡率或
罰紙贖以便上納且誠心勸諭各村士民使咸知以義
相尚不待督責而出穀皆其情愿徐因倉置簿登記其
數凡出穀多者則破格旌獎民其有不以義相從者乎
況因時制宜隨俗勸誘或禁止神廟賽會定為香錢或
違犯鄉保規條畧示懲罰由此日積月累則一村之穀
自足以養一村之民每年青黃不接之時令其出放息
止加二小饑加大饑免息成熟之年仍令各村量行

添入此法若行之有常三數年間各村之穀殆將不可
勝食但民之誠偽不一而官司之意向不同若非出納
有經奸民或因之以滋侵漁負騙之私官司或移之以
補官倉積貯之數是非惟無益於民而且有害於民也
然使經官查盤則又重為民累合無免其查盤止於府
縣給印文簿付鄉約正副每歲稽查其各村管理收放
即於本鄉每年輪一公直殷實者以司出納量與免其
火夫丁差以示酬勸如此則奸民不得以負騙官司不

得以那移即遇水旱凶災復有官穀以濟之自是貧者不患於阻饑富者可免於勸借而盜賊亦因以潛消地方之民永有賴矣

一社倉之設本以為一鄉也穀以義名則當以義相先斯為善俗除捐俸并發紙贖以為之倡及士民尚義出穀多至百十石者不可為例外大凡當秋熟之時或每畝量出穀半升或通鄉各戶富者以石計貧者以升斗計俱報數約正副登簿保長收入社倉每春

有闕食者量準借與就於保長處會同約正副批立
合同登記簿籍候秋收之日加息二分納還但借穀
者亦不得多至十石以外恐一人奸頑無耻催收稍
難則將并一鄉之義舉而壞之也

一每遇年荒大戶例有勸借蓋官穀有限各村又無義
穀故也若使村村有穀則一鄉之積自足以供一鄉
之人加以縣倉積有官穀勸借之事以後可免且尚
義出穀而使本鄉之人俱感其惠亦處富和隣之一

道也不然富本衆所忌也積心慳吝因之阻壞義舉
設遇凶荒寧能獨保其富哉

一出穀雖非貧者之事而歲時豐稔或一斗或二三斗
亦可量力出辦準與荒年揭借義穀亦有數倍之利
若豐收之年斗穀不肯出者荒歉之年義穀官糧俱
不準與

一各鄉舊有土神廟即有社祭之禮但俗尚奢侈因而
迎神賽會花費不貲不特褻瀆神明幽有鬼責致怠

事端且明有人非從今鄉約舉行一切禁止或有情
愿施捨冀神佑助即宜準作香錢自家告諸神明益
記鄉約簿積為義穀以濟人貧難豈不神人兩得之
乎每歲春秋祈報買辦猪羊酒菓香燭等項即於義
穀內支用祭畢舉行社飲申明約法和睦鄉里庶彬
彬然成禮讓之俗矣或有貧不能存喪不能舉者亦
於義穀內量給以助之會衆公議而後動支各明白
登簿以備稽查毋得徇私濫支冒破

卷十五
一各村納穀或社倉未備權借民間空房收貯待置倉
後再行收入或鄉村空曠苦於看守不願立倉者即
公議積貯亦從其便

一給借固貴均平亦慮陷失穀本每年支借之時須會
衆公議量其可借方準托保借與敢有輕借游手無
賴之人以致負騙及強梁奸貪之徒以市私恩俱於
收管人名下追賠其收管人敢有捏開花名私取規
利者衆共呈官追罰若出入公明每年亦宜量給以

酬收管之勞

湖廣澧州社倉規約序 萬鎮嘗謂周禮一書為民慮深矣其比閭族黨必相掾相賑六行教民必使任卹繼於媯睦之後古之聖人既愛其民又欲使其民之交相為愛故法立而俗厚有由也吾鄉自罹兵革之餘故老凋零習俗頽弊富家巨室溺於商功課利之習又無君子長者之論以激發之故舉事而益於已則為舉事而稍損於已則弗為甚至積粟紅腐以俟饑歉穹其價以厚

其售曾未聞有倡於義舉者吁何薄也間有稍異流俗能好義者不過曰修道路之崎嶇治谿澗之瀾漫以為往來稱便而已夫道路未斃止艱行谿澗未砥止病涉此一夫之任爾假令民日乏食久之弱者轉溝壑强者奮臂大呼相率而為盜事勢至此以富自足者可保乎余平生念此久矣因觀先儒文公朱先生在建遇大饑請於官作社倉建甚德之其事有感於予欲率鄉中富而有德者法而行之凡與盟者穀以十斛為率十人所

聚穀百斛擇里之賢有才者司出納焉其法則倣文公規模使貧民歲以中夏受粟於倉冬則加息十二以償歲小不收則弛其息之半大稔則盡弛之期以數年子什其母則惠足廣而息遂捐之於民不惟民有所給食無復變亂之虞而古人相掾相調任卹之法所以使之交相愛者庶幾復見於今之俗矣顧不偉與因書此以為同志告幸相與勉而行之

汪道亨修舉社倉事宜

一議本穀 本社集社長社副社衆會議各量貧富家
口為多寡戶分三等等列三則其輸穀之法每月一會
約定會期上上戶每會一石上中戶每會六斗上下戶
每會四斗中上戶每會三斗中中戶每會二斗中下戶
每會一斗下戶不與社穀初貯穀本尚微不許輕易歛
散如遇便肯以一歲之穀盡輸於社或分為三四會輸
完亦可不必拘定作十二次如粟不便者許納銀錢登
簿遇賤糶貯社中若有家道頗殷而絕無斗穀入倉者

即書某人名加以頑吝二字貼社倉內但遇荒歉官社倉穀俱不准給其有鄉村隘小不能分三等等不能列三則者即隨社大小減之其穀之數亦酌量增損

一議義穀 凡社中富而好行其德者能於本穀外願輸二石入倉者紀善一次四石者紀善二次十石者紀大善一次二十石者紀二大善三十石者紀三大善州縣掌印官獎賞輸五十石以上者該府暨州縣送扁書好義二字輸百石以上者本道送匾書施仁二字照例

給與冠帶輸至二百石以上者准給冠帶優禮本道及
兩司送匾書樂善二字其輸四百石以上者申請兩院
送匾書積德二字給與冠帶仍優免雜泛差役犯罪不
許加刑此外若輸粟八百石以上者申請兩院照例奏
請豎坊表里

一議罰穀 凡官司自理贖穀除照舊入預備官倉外
其各社有鄉約演禮不到保甲直牌怠玩及一切違犯
稍輕者聽約正副酌處罰穀其有本社小事口訴不平

者聽約正副量剖曲直罰穀使之平息以省赴告及株連干証之費或赴告而自願和息者該有司酌量罰穀輸之該社取其倉收免罪情輕者批約正副查處量罰是為罰穀登簿備查

一議息穀 倉穀收貯若干每年於二月起至三月四月止宜出陳易新餘月不得輕借其交還月分自九月起至十月止不得延捱以致穀價漸貴輸納愆期初年穀本尚微每石取息二斗如時小歉則減息之半行至

三年之後穀本漸裕每石取息一斗如時小歉止取五升大歉則盡免其息凡給借之戶或過時不還或還而濕惡不堪者送官重治後次不准再借出借之時須會同集議量其可償方准托保關借如游手無賴刁頑無信強豪不馴者不得輕與如或輕與以致負騙者俱在保人及收管人名下追賠收管之人捏開詭名冒領私取規利者許人訐告另行追罰每放借完日即將本社中下人戶支借過穀石若干應該息穀若干一一登簿

以便稽考餘穀收貯不得混支升合每年終結算出入明白給與收管人一石以償其勞

胡其重曰社倉之制原為周窮恤乏若量其不能償而遂不借是極貧極苦之人反不獲沾周恤之例似難為情雖以糴本為重殊失立倉之本意矣此處仍須酌議至於年終償收管之勞當以二石為則

一議倉庾 以上四等倉穀收貯倉庾之法不可不講須查各處舊有倉者基址或嫌狹隘相應設法量增房

屋或係假借相應措處凡建倉屋四圍空曠不近居民烟火其有與之相近者須買磚堆砌以備不虞以上費用俱於四等穀內取之或有尚義之士獨任其費者官司重加獎賞其平素無倉地方若新斂有穀或於各鄉約寬餘處所寄囤或各鄉約所有空居即處其值易買俾鄉約社倉合置一處尤便或借廢寺廟庵觀暫貯俟穀積果多則公議扣穀建倉凡有人樂助者或銀穀或木石隨意多寡俱登記於簿勒石垂名各該州縣每年終

通查所屬共建社倉若干仍將千字文挨順里甲編立
字號共若干處各置牌匾大書某字號社倉五字懸掛
倉門該州縣將總數報之府州以便稽察

一議收掌 各處既有社穀社倉其收掌出入當立社
長一人以本處齒行俱優者為主更蕪家資殷實者為
之更妙或即以約正保正為之凡社中事務皆聽裁決
又立社副二人以年力強壯行能服衆者為之或即以
約講約副保副為之俱要大牙相制社長專管封鎖社

副二人一管出簿一管入簿又立社傑二人或四人以壯年公直有才幹者為之俱從社長社副指使分任勤勞既立諸人之後須置社穀出入二簿先將各戶輸穀登記入簿內待出放之時仍將各戶借過若干數目登記出簿內造完送官查驗印發本社待後照數催收

一議典守

社倉既設則典守不可不議如或社長近

倉則即以社長兼主守之事社副社傑亦然或俱不近倉則宜另立社直數名或以本地人夫輪流值日或換

甲選擇一季一換俱聽便酌處不若於社倉之傍公立社學令子弟在學讀書則莫非看守之人不必更立社直矣務須加意防閑不致疎虞為要

一議稽核 各倉積穀既多奸民或因之以滋侵漁若經官逐一查盤則必重為民累合無免其查盤止於本府管糧廳置循環簿二扇各州縣每年五月將放過若干十二月將收過若干赴廳倒換備查各倉放出收完俱報本州縣其餘出入民自收掌官司或因路便或出

不意抽查以革奸弊其經營之人如果公勤謹慎衆所
悅服增息穀至三百石以上者稟官旌獎其有侵欺及
借貸之人負措互相容隱者許諸人指名首告官司着
實查追不得姑息

一議分賑 凡遇大祲之歲官府行賑之時約筭本社
除上等可以自給外其餘中下人戶各照本穀原數聽
其分領自非凶荒不許討支其本穀之外尚有義罰息
等穀約筭若干社長等公議酌量本社應存若干以防

後日應賑若干以救目前分數議定而後開倉其平時
施穀入倉先上上戶次上中戶次上下戶次中上戶次
中中戶次中下戶其凶年賑穀則先下下戶次下中戶
次下上戶等而上之至中上戶而止仍查其中有先富
而後貧者准賑先貧而後富者不准賑其年力強壯能
為人營運及堪為人傭社中有興作者收之給與工食
傭工有力強而不為傭不事生業坐以待賑者賑凡二
次即止其分賑宜常畱贏餘以備後賑

一議推恩 社倉行至三年以後粟有贏餘凡社中好修貧士孝子順孫不能舉火宗族親戚俱無足恃者貧而有喪不能舉及子女過時不能嫁娶情景可傷者節婦年自二十四五以前孀守至今已踰五十一向無隙可議者民年七十以上貧而且病衣食俱乏者俱聽社長等酌議周恤登簿報官不許徇私冒濫

一議費用 倉中逐年紙劄及修整倉廩書算守倉人等茶食工僱并春秋祈報應辦儀饌俱各訂為定式使

不豐不儉經久可行或所用反過於所積或所積僅供其所用則非立法之意預備儲蓄之策矣務宜斟酌若日久穀多又將穀本漸置社田亦無不可

一議社學 古之教者里有社家有塾黨有庠此教化之所以易行也故社學亟宜舉行社長人等各查本處現有社學或只有蒙館幾所坐落某處原無社學須公同酌議於公衆地基置建社學亦照社倉出穀事例勸諭衆人隨力樂助或待社倉行久以義息等穀創立建

立之後即報州縣亦順里挨甲編號置匾書寫其字號
社學懸掛館門既富而教亦化行俗美之一大關係也
勸輸文 沈鯉 夫倉以社名則非獨有司之事也蓋所在
居人均與有責焉傳曰未有好仁而不好義者也
未有好義其事不終者也今吾邑侯為吾邑賑荒計既
肥肥若此矣豈鄉士大夫與居民有力者自為桑梓身
家計反不能好義終其事與吾知其必不然蓋往見里
中士大夫饒於財者未有不結社飲酒以一日之樂糜


小民終歲之費也未有不窮奢治具集水陸之珍強容
屬饜而容謝不能不止也未有不盛飾山池臺館魚鳥
花竹聲容耳目之玩而費累千金不惜也未有不以其
鼠壤棄餘委諸無用而明以資火盜陰以損已福也諸
如此類費何可勝計吾不謂諸君之盡然間亦有不免
焉者儻稍裁百分之一以輸之社廩備荒年賑濟而起
人溝壑之中不過升斗中一粒耳而遂能施仁義以行
德化無用為有用諸君亦何憚而不為此而忍負賢大

夫此意也夫既名為士大夫讀書明道理當思天下饑
由已饑顧乃於同室之困不少置念凶年饑歲家有餘
貲廩有餘糧僮僕溫飽而目睹鄉井餓夫枕藉溝壑者
曾不少顰蹙其眉則亦與凡民何異於讀書明道理謂
何此無論陰隲暗虧缺望難釋第人皆有不忍人之心
豈以吾輩號士大夫反不能善推其心以為鄉閭倡耶
且條陳民間疾苦以請命於邑大夫亦吾輩責也今邑
侯不待斥言先自軫恤厘思善後之策欲使吾父老子

弟長無凍餒吾輩有不感激踴躍相率首應者非夫也
諸君必不爾也乃若環邑居民雖稱不腆然其間有力
者不嘗有結社攢錢隨會講經為人所籠取乎不嘗有
修寺建塔鑄佛塑神望南海走東岱跋涉道途足重繭
不惜乎不嘗有齋僧飯道建醮設壇為遊食供糗糒而
自謂修因果種福田乎夫此數者皆無益之事而為人
所鼓勸輒竭屨恐後積穀備賑乃有益之事而邑大夫
惓惓焉反趨趨不前此何以說也夫神明正直無可私

媚所福祐者必是好人既是好人必行好事行好事無
大於濟人利物濟人利物無過於凶年饑歲與人盂飯
可當斗粟舉我一念可活一人故欲積陰德行好事者
惟此時最得力亦惟此時最省事神明降鑒惟此事最
分明亦惟此事最錫福諸君如欲為今生為來世為身
家為子孫當無以逾此者何故不為而乃營營焉役役
焉求之於茫昧窈冥之中不見有分毫報應之益也吾
又為諸君大惑之夫公輸苦浩繁而社輸有限量公輸

有程督有稽覈有罪係而社輸緩急自便賠累無虞且
自積自備雖為人亦為已也況貧富何常吾今以濟人
安知他日不有人濟我也惟願士大夫與居民有力者
謹承邑大夫教令而道揚其波澤以贊成盛舉無忽



荒政叢書卷十一

欽定四庫全書

史部

荒政叢書

卷十下
附錄上

詳校官編修 臣 溫汝适

編修 臣 程嘉謨 覆勘

總校官庶吉士 臣 倉聖脉

校對官中書 臣 田尹衡

謄錄監生 臣 俞鳳

欽定四庫全書

荒政叢書卷十下

湖廣布政司叅議俞森撰

沈鯉社倉條議

官廩之備賑社倉之廣積均以為民也然就兩者而較之則官賑終不若民間社倉之為愈也官賑不過一二所社倉則逐里各有建置積之多方備之無窮而輸散不出境其便一官賑者官自為之也其勢獨社倉者里

人合力為之也其勢分則集其力於衆獨則總其勞於已衆力易舉獨力難周則任獨不如任衆其便二官賑必須憑里甲報舉而里甲諸人皆素以漁獵自資者也報者未必貧貧者未必賑反使公家積貯徒以惠奸則賑施文具耳社倉則有公正好義衆所推服者為有司分任其事而又有賢人君子可備諮訪故本里居民孰貧孰富孰上孰下一一皆有真見粒粒皆有實惠也其便三官賑必須按里甲次第較戶口貧富多寡逐一

審問有司或有他務相妨則勢又不能速審曠日持久
遂使枵腹垂斃之民日望倒懸之救或不及一餐以死
者有矣社倉則各濟各坊隨投隨給其周之若燭照而
予之如取攜其便四官賑不免有盤撥轉運之煩有需
索使用之費有斗斛高下之分有推挽負戴之勞而社
倉則悉無此累其便五官賑率不過一二所而境內饑
民嗷嗷待哺者常千萬計駢肩聚集沴氣薰蒸多有他
虞社倉則各里各坊分局自濟散而不聚自無他患其

便六且民俗之日以澆漓也如逝波之東下而不可復返也社倉既立則里閭共為有無必藹然有同室之義一體之情蓋不但緩急相周即百姓親睦民德歸厚亦且由此其便七人情不能無公私今令于國中曰吾勸輸備賑出爾私藏而公諸同邑不相識之人非甚僇儻誰能應之哉惟各里有社各社有樂善而好義者各相勉其本里之人動以惻隱之良勸以陰德之報人必不能恣然於此而荒年賑濟亦惟此里之人得用之而不

以泛及其他即輸者有時而貧亦反以自取給焉嚮其利為有福此民之情也因而導之當趨之如流水矣其便八且古人于蒐狩寓講武于井田寓譏察于東南其畝而溝澮互分者寓禦暴於先公後私者寓作忠於相助相友者寓厚俗大抵制一事則默寓一法如社倉之法行則里中之善惡賢愚孰可用孰不可用皆得周知之是政教之助又在此矣故曰官賑終不若社倉之為愈也

社倉千古良法其終於不行者則以尚義樂助慮有大
戶之名出陳入新恐有催徵之擾官司稽察則有吏胥
之累甚至官長公事所需或借此以應急久假不歸私
藏化為公用積之艱難者必且廢之一旦是以士民旁
顧遠慮懷疑揺手而不願為也必得良有司堅意主持
誘掖獎勸鼓舞作興鄉先生表帥閭閻倡率贊勦力請
當事具題飭禁凡力行社倉處所永不科派大戶決不
官吏監督決不經由查盤決不那移借用設有姦蠹蠱

或有司擾民紊社者立治以法則民志一定而不疑知積聚皆實濟里中緩急綢繆桑土之具靡不爭先從事矣

世有治人無治法法之善者全藉得人以相助為理今擬各里先推舉好善而公正老誠而精敏者紳衿士民

十餘人

如本里縉紳雖多止須推舉一二位坐鎮主持其餘俱選士民耆德以便効勞宣力

立為

社正二人社副四人

正副專司其成但恐或以冗奪或以病廢故多備員以便司董正務

社直四人

凡社中應舉應廢之事社直得調停之不公不正之事社直得糾正之

社幹八

人 凡急公輔弼如徵收銀米出納錢穀開
寫冊籍策應公務皆須多人以便分任

得人最難善任尤難喜事者未必堪充堪充者未必
喜事凡賢良先達及孝廉庠序中忠厚廉潔之士或鄉
里有德望誠信謹愿好義之人有司察其行實以禮敦
請既舉之後即須實心任事虛公博訪務求盡善盡美
倘里中有敏智博達議論平實可用者不妨延請同事
或他里有良法足採者不妨改絃易轍若局中之人惟
知執拘事外之人徒行腹誹不惟有失同井友愛之風

亦何以令社事可大而可久耶

社正之任與州縣鄉約長之名不同蓋鄉約長則以良善耆民為主然既繫籍在官則有叅謁迎送調處地方則有伺候審理至於公私藉賴則又未免妨功費用今之社正則以紳士聞望之人為主專司社倉一事不必責以叅謁迎送也惟社中有梗法頑賴者方據實聞官官為懲治不必伺候審理也而又公私不擾無妨功費用之虞故以鄉約長之有才幹者或兼攝社正之事則

可如以社正而欲無鄉約長之名則斷無人肯任社事
終無可成之日矣

社倉之莫舉也貧者恒自諉於貧富者又恐自揚其富
以此因循緣無真實任事之人遂無真實辦事之日也
今谷里既推舉數人為之董率矣即將本里保甲冊逐
戶詢之願者入社不願者勿強其願者可即用黃寸楮
印成樂善助倉四字實貼本家門首每月止勸輸銀二
分一年共輸銀二錢四分計日積七毫即可勸事但恐

立志不堅始勤終怠耳於鄉則須履畝勸輸腴產畝輸
米二升中產畝輸米一升下產隨其便或遇大有下產
亦宜勸輸蓋鄉民愚而寡謀粒米狼戾之年多為無益
妄費之事與其妄費而無益何如存於本里社倉為吾
他日饑荒救命之有益而不虛耶況農民最苦青黃不
接之時貸富室米一石者必加四五利償之一夫之力
所入幾何宿逋既要償還新租又難遲緩以致日瘠日
貧流為頑鈍無賴而產主亦陰受其弊焉社倉一行則

有無相通不致重困貧富交利之道也須共諭之

或每里於同志中擇廉隅有素望實心肯任事者十人為會首作為一朋每會首名下各募樂善好義者十人月輸銀一錢如力不足者不妨合數人共出一錢會首斂集投社月計積銀十兩歲可得銀百二十兩於鄉做此積米不出三年社倉可成若好義者多不妨多立會首列為二朋三朋可也

三吳風俗浮薄武林尤甚雖屋宇華好被服粲然而或

家無宿春之儲且俗尚釋道好善者每竭力以事方外
家本無中人之產而樂齋僧建寺以冀冥福外此二者
或有饒裕之家則又惜金如命錙銖難割者也夫此正
大光明濟人利己之事饒裕慳吝者既不肯為家無儲
蓄與崇尚釋道者又不及為是則相助為理必賴於通
達世務而好義之人矣合於城市鄉都廣勸樂輸多少
悉聽待利至數倍之日仍遵朱子法撥還元本凡有祈
福禳災犧牲淫祀壽辰生子優伶筵宴等無益妄費悉

當勸省以益社倉此外里中或有鬪毆爭訟事在有司
尚可調處者或令其量力捐助具息回官更有呈誤小
罪應干吏議者或情愿捐助免其究理仍不暴其過犯
之由書以義助美名隨緣鼓舞事可以集也

稽察戶口社正副等公同里書及保甲等逐戶挨查書
其居址何地房屋幾間或係已產或典或租年甲幾何
男婦幾口同居幾人作何生業或有高年七十八十以
上或有孤寡殘疾之人皆須一一詳列而所抄戶口又

須分別四種如衣食充足者書以仁字衣食僅足者書以義字衣食拮据者書以禮字衣食不足者書以智字以為後日平糴張本內中設有孝子順孫義夫節婦以及安貧樂道賢良方正之士必須訪實以備當事採擇其有不良之輩亦須密密令人委曲開誠化導令其悔過自新更有一種精力強幹遊手失業之人當思收羅撫用或勸習手藝生業而又怵以禍福忠義戒其恃勇露才以取禍患至於土妓流娼窩盜作奸夜聚曉散踪

跡可疑者當曉諭本甲協同地方令之出境以免他累
凡此皆以本里之人稽察本里之事自能數計燭照物
無遁情則保甲之事即寓於其中從此力行鄉約擇善
講者宣揚解說月一舉行於以阜民裕俗何有

各里每保置收銀米小簿二扇公所置收銀米總簿二

扇用銀米簿二扇雜記條約告示等項簿二扇

其簿俱用鈐縫

印記其一社正掌之其一社副或社直掌之以杜曖昧不明及防水火意外遺失之事仍置大簿

一扇書某某輸助銀若干共收銀若干糶米若干糶米

若干仍存若干某某助米若干共收米若干貸出米若
干得利米若干雜費米若干仍存米若干逐年條列舊
管新收開除實在四柱清數造冊報縣批驗用印仍各
領回外再用簡明總數開具一呈存縣立案以防欺弊
里人既肯同心樂輸每日清晨即宜拈銀少許另置一
處積至月終雖極貧者不患無二分之積矣銀期足紋
隨便零頓交納其收銀者即用社中人每人分認一保
保各一簿逐月逢九收銀給票於每月初八日齊集公

所併銀稱估面同登簿本月收銀若干折色若干實收銀若干隨傾十足積貯某所今以小里分計之里中好義者或有三百家家月輸銀二分經年可積七十二兩隨以此銀分寄典舖或殷實之家可朝呼而夕應者薄起利以生息之或竟至冬囤米夏間乘時價糶之如此漸積至十年又併每年生息雖小里可得千金之米況又有樂助者乎故亦不必拘定十年但使每年徵積得本里有米五六百石即可停止輸助矣

城市積貯最難初年集資未廣且宜將銀生息惟擇店業茂盛及溫厚信義之家多則貸之十金少或一二金周年二分或分半起息但取呼吸立應耳若夫薦紳則不敢勞生息庠友則不能勞生息胥吏則不便勞生息也

鄉都曠野之處或效北地社倉之制蓋建倉必須上棟下宇有碑瓦木石之費有透風重簷之設而雨雪薄簷易於沾濡鳥雀緣空易於剝啄倉鼠穴墻易於圯壞則

又必歲時修葺費且不貲況穀既入倉陳陳相因則紅腐而不可食出而晒晾之則遞晒遞減因緣為姦矣社倉狀若圓困所需惟草木泥芭無磚瓦木石之費日色易透則不煩晒晾無重簷則鳥雀難入四周時有人跡則鼠不為耗誠便利也

城市多流寓遷徙不常若槩用朱子加息之法倘貸米者一旦遷去則社本化為烏有矣城中社倉斷宜兼用平糶一法每歲五六月間先筭積貯幾何石里中貧者

幾何家通盤打筭約可平糶幾何審其戶口量減時價
給票赴糶先儘最貧後及次貧 此為穀貴設也若是
冬米糶價一兩至夏米糶價亦止一兩則折耗無償似
不必逐戶平糶但照時價總糶之為推陳致新之計可
也若冬米一兩夏米一兩二錢除去折耗亦獲息僅十
之一止可積為荒年平糶與賑濟之用本年亦不能減
價糶也

朱子社倉法諸路有願依此置立社倉者州縣量支常

平米責於本都出等人戶主執斂散每石收息米二斗
收到息米十倍本米之數即送原米還官却將息米斂
散每石只收耗米三升其有富家願出米本者亦從其
便息米及數亦與撥還今議州縣常平空虛勢須里
中自輸自積如銀米積至十倍本等之日其城市之人
除遷徙別里者未及還外其原居本里者仍總其本銀
之數一一扣還至於鄉都之人亦總其本米之數皆一
一扣還由此言之每年積之零星十餘年後却能收之

整頓在貧者既可抵正務之需而在富者亦足為高深之助是猶藏之外府耳而又有好義樂助之名人亦何憚而不為耶

朱子法將息米斂散每石只收耗米三升蓋朱子有遇饑蠲息之議初無賑濟之事也今當稍更其法待息米斂散之日每石仍取利一斗另記一冊號曰倉餘一以備荒年賑濟之需一以備常年勸善之用如禮高年恤孤寡立義學拯疾病禍患之屬是也

社倉雖聽民間措置有司並不干預抑勒但事成之日
必須呈明上臺設有侵欺等弊或暗敗公事者許諸人
直陳其奸官司立行處分務使懲一而警百以杜亂法
之萌可也

小饑固蠲息矣設遇奇荒不妨併免其本待後陸續帶
徵徐圖如前措本可也

按以上社倉條議係歸德沈鯉所作後為杭人張文
嘉所增刻本不復分別今併錄之不及辨也

倪元璐翼富倉叙 歲大侵民多死徙公私上下皆以
成周委積之義為當求其當事大夫規弘經遠惻然聚
而謀其大者以求儲於官元璐爾存城曲以拘墟之見
退而與其鄉之士大夫訾然謀其小者以求儲於社乃
稽古社倉自隋及唐參之伍之要皆有未協者以其資
計威教悉仰朝廷蓋非鄉之自為功者也鄉之自為功
者古今惟考亭一法然在考亭自為之則良他人行之
或敝繼此真文忠行之武安亦良其後人踵為之日益

金史卷之八十一
卷之八十一
做考亭不曰里社不皆可任之人乎所謂可任之人者
能人義人慎人信人廉人天下苟不得是數者之人昔
之碧血今為冷風悲哉法之倚人行也元璐之法因時
制宜欲使雖不得數者之人而亦可不害者則有五道
焉曰託卑託卑者何也夫託尊於官即廢興由官官雖
賢三年而權盡崇安之法之所以不復者亦以其後舉
倉歸官耳今以士人世其事以中壽量之極其身三十
年其子若孫親見其事習其所持各人三十年是則百

年常在望也百年之法以官守之須三十人以土人守之父子孫三人而已家無繁令而安里有多言而憚此為雖不得能人亦可不害者一也曰居約居約者何也千人之聚有田者常數十人若以王戴之法敵責輸升是使數十人共執倉命也此數十人者必有數鵠焉必有數蠹焉今約之五人則尊俎揖讓定縱堂皇者五人耳其千人常在階下其數十人常在壁上謀靜而專志咸則銳此為雖不得義人亦可不害者二也曰絕累絕

累者何也劉晏以假貸非福青苗直以貸禍即崇安良法後人敗之拘催不堪咸以咎貸是故以粟貸民求息則粟有再死民亦有再死民頑不時歸粟粟小死歲大饑問諸鳩殪粟大死以法治民頑民小死春散秋斂五六月間價踴求粟不得民大死今就糴徵利以平為功金粟迭處不離其據此為雖不得慎人亦可不害者三也曰制欺制欺者何也大嚼者咋斷其舌左手持鋸右指惕血一身不可相信而況於人乎故鳴鼓雖公不救

往過要鼎雖薄不形來愆今質入穀出以鍾易石是使受者不私私者不負驥駑同櫪不見驥亦不見駑夷蹠並居不患夷亦不患跖蚨飛去來倚枕聽之周鄭交質之謀而有遠古結繩之化此為雖不得信人亦可不害者四也曰藏富藏富者何也過府而戟指者希不有盜心執炙終日寧當不知其味乎寢處京坻而我無與焉不及十年庸人皆倦矣今以為其家之肥暮而歸子旬而歸母後乃盡子困子凡穀六千石受息千二百石計

土田歲入穀五石千二百石則為腴田二百四十畝是則五家子孫世世之業也富此五家而千家乃不饑食五家於倉而倉乃足千家之食自抱其珠誰得脫者此為雖不得廉人亦可不害者五也凡此五者皆古所未嘗謀自元璐以意創為之妄計雖甚淺踈斷可百年而上因著為說以諭同人今饑民習賑等於驕子更一年不登誅求富者必立盡此云翼富是為富者策救使不得貧耳至所寓意保甲鄉兵云然者安知是倉不為武

庫耶或疑此法終難行者固也當考亭始議社倉時呂東萊規以任所難任恐不成功朱呂且然何況今日雖然請自隗始

翼富倉條例

一每坊村各建義倉一所度可容六千石者或初年物力不敷暫借同會中私囤貯之俟後資集補建充拓可也

一倉以防盜備火為要

一會侶以少為貴五家足矣內有資計不足集兩為朋者其出名任事惟只一人意防敗羣此為切着更少至三家兩家或一人獨任尤妙

一千石五百石各隨其便

一倉分運定二號運倉以供春夏平糶轉輸於秋成之前者也定之為言停也畱之秋成之後以防臨獲忽荒如萬厯戊子大稔將收忽大風落穗遂成奇荒故須八月萬寶告成然後發糶凡新穀入時人爭貴陳

米礪淨出糶較新米可贏息三分少亦一分五釐即
時回糶新穀以一本一利還倉

一每年入穀以蚤穀方旺晚穀將升之時為度其出糶
初年穀少恐太蚤猝遇米貴無以為救須六月中旬
以後幾及秋成之時方可出倉其後穀數漸增惟權
饑口扣畱平糶百日之資為備其餘不妨隨時徵貴
糶之地方又初年每五百石量畱百石至新穀既升
以陳穀發糶亦防意外此因定倉無穀而然其後定

倉穀入至五百石以上運倉即不必更畱餘穀遲糶
矣或當五六月時大水亢旱荒徵已見即應悉畱停
糶以備非常蓋大饑極歉非畱經歲之糧不足以濟
也

一每年以七月十五日交盤運倉糶出本利銀兩以九
月初一日交盤定倉及遲糶陳穀本利銀兩承領者
必先輸質物田屋照活賣貨物照典當以十抵六仍
集衆公驗由票真偽產業虛實器物佳惡計穀本利

萬全無失就冊開寫明白交下肩收執方准承領其
次年下肩領到本利不欠方准發還原質如少欠留
質勒補多欠即以所質物當之此為經久之計不容
不慎且相稽相察一彼一此不須拘嫌違約者罰
一穀息運倉以二分定倉以一分五釐為率浮者悉入
定倉充修倉犒丁及抵補等費縮者於所給五家剩
息內扣抵如又不足明於冊內開載本年少利若干
俟後贏年補足

一每年交盤之際上首知會定期次及者陳戒牲醴集諸家於闕聖及本境土穀啟焚誓文隨具散福小飯
公同交割承領

一每年糴穀既集司會具五簋小飯集諸家驗過仍將糴數及價登載冊內至出糴平糴之時俱各知會諸家集議而行不得專擅徑遂違者議罰

一平糴查清戶口分為上中下極四等上戶不聽糴中戶六日一糴下極戶三日一糴極戶仍減平糴價什

之二每口日五合初年穀少或只三合給票驗發往
年凶米價騰時坊分二等次貧平糶極貧給賑今有
社倉歲歲平糶則無凶年矣故不分糶賑惟減價示
優若有非常又非此論

一坊各管坊本坊平糶所餘發糶他邨坊者一准時價
一糶價賤與糶等即免科利亦不分給五家或糶賤於
糶虧折原本五家仍斂資補足如數俟贏年補足五
家

一定倉穀隨用隨補取之五家分息一年不足則以兩年三年完之務如原數而止

一五家先而收息既而還本久而徒手得利日久益充此為藏富於社猝遇大饑大賑倉所不足此五家者即責之傾貲以應其何辭之與有

一穀以極燥入倉自然不耗升合耗即始入不慎之故司會自行賠補

一日後穀盈或上官以公事勒借他方以缺糴告通者

皆須死爭不應不得則率一方之衆操引誓條婉切

陳曉事必當止若畏禍徇情以致虧廢者具如誓言

難逃神斧

一每常平糶之時懼有他方起而強糶者預選本坊壯

丁自十人漸增至五十人

初年物力未敷只可十人或二十人以後漸充則漸

益至五十人而止署曰護糶鄉丁每一次平糶輪十人防護

有事則糾衆遏禦每一次值班十人各給穀六升秋

收新穀既入統給各丁人穀一石

俟後穀充漸可加厚秋給歲以為常

日給不遇自初年選定人數姓名年貌登載丁冊永
平糶即除

永用之不堪則革遇缺即補以寓保甲鄉兵之意云
一助罰等穀皆入定倉

一建倉之費五家各出糶穀之費取之糶本惟修倉及
護丁工食司會借發取償公息先扣後分本年或無

可扣明年補之

倉或間歲或
三年一修

一給賑無告雖豐年亦然然且索之十年之外者惟因
初年資薄尚難廣捐要在仁人豈能等待因時起義

隨所用心爾

一置冊八扇共一套 運倉出納冊一扇 定倉出納

冊一扇 贏息出納冊一扇 交盤冊一扇 納質

冊一扇 雜費冊一扇 助罰穀冊一扇 護丁冊

一扇

誓言文某年歲次某干支某月某日某干支某坊鄉司社
某某等昭告于某神之靈曰循古之制如何得饑常
平制公崇安制私私之扶公譬轂輻持爾坊我鄉則

各有司積貯大命閭黨連枝同道為朋主善為師道
存救患善在因時非若青苗貸之督之以濟取利如
草春滋乃倉乃箱千斯萬斯菜不著色珠不入炊堯
不怒鯨湯不畏蠟凡若此者皆神之為以饗以祀敬
歌楚茨冀神有靈明昭孔時水火盜賊屏諸四裔並
形彰瘴閑邪禁欺或不率具如誓詞

一侵沒三百石以上承上誓二百石以下五十石以

上承中誓五十石以下承下誓

變賣所質不失原
數許於完日牲酒

告神

懺釋

一欺隱贏息及飾贏為虧者承中誓

一既分倉息而遇倉缺乏應歛資分吝不應者承下

誓

一以偽由物質者承上誓

一官借民借不能力爭以致虧廢者承上誓予受昏

然

一一切費用妄報浮濫者五十石以上承中誓

上誓奪算祿俱盡 身無可奪則及子孫

中誓奪算一紀 身無可奪則及子孫

下誓奪算三年

蔡懋德修復社倉議從來救荒無奇要在平時預備如
古人常平倉義倉皆可行而朱子社倉之制為最善近
見臺臣申飭天下守令乘時積穀一疏此皆備於未荒
老成憂時深慮則凡可推廣德意與軫恤氓艱者似不
妨權宜變通况良法亡弊成規可遵如社倉者乎但法

須簡便著實其中事宜借陳六則於左

一定倉制朱子社倉法初建之崇安開耀鄉請於本府
得常平米六百石夏間賑貸至冬納還每石量收息米
二斗自後隨年斂散歟則蠲其息之半大饑則盡蠲之
凡十有四年得息米造倉三間及以元數六百石還府
見儲米三千一百石在倉不復收息每石止收耗米三
升一鄉四五十里雖遇凶年人不缺食其有富家願出
米作本者亦從其便息米及數亦與撥還此社倉之制

朱子請於朝通行天下者也今宜倣其意而消息之即附鄉約保甲而行每鄉有約每約有倉以本里之蓄濟本里之饑權豐歲之贏救歉歲之乏緩急相通不出同井子母相生總利吾儕此鄉中人何苦而不樂從哉曩時社倉難舉易廢者以士民一輸穀入倉即為官物封貯不動有耗無增人安得常樂施廩安得有餘積蓋襲社倉之美名而失社倉之妙用所以間行而不能經久也今一如朱子隨時斂散加息減蠲之法而更因時變

通於其間則法可久行而澤遍郡邑矣

一因倉基建倉工費此時必難即辦既奉憲行鄉約必有約所在寬厰寺觀即於寺觀內擇堅固空房一間或三間量里蕃寡以為增減杭地梵宇甚多不難設法修改其他預備常平之剩厰空閑公署之餘屋亦可隨宜酌用總求因便以省營造之費

一裕倉本昔朱子請府米六百石為本今議每鄉置倉難盡請給於官矣欲勸民間義助恐杭地鮮蓄兵火加

派之餘未必樂輸響應今奉明旨四積之法中可斟酌推行如納粟援例事關達部而本鄉絕產為奸里影佔者可清出即充本社穀本也金作贖刑部文除大辟外照例准贖所括甚廣然恐開富室便門而罪外批加刑責及例重情輕者可量納穀本社從輕宥免也時雖詘而尚義有人即於講約中委曲勸諭賢士大夫畱心桑梓身先為倡井如朱子法息米足時撥還原本其樂善義士必有風行雲轅者而又通以憲頒約保旌善懲惡

之意如一約中人戶富而好義者量力輸穀若干石與孝子悌弟輩一體載紀善簿其犯罪應記懲釘扁而知悔改者願輸穀若干石姑免載懲惡簿再犯不悛然後載簿釘扁其門總在本鄉中隨方設法鼓舞流通而倉本不患為無米之炊矣

一推倉長社倉既附約所即用選舉有家有行約正約副司之夏散冬收聽在本約通融權貸仍量議看守折耗之費縣正官印簿二扇一存縣一存倉止報出入時

日數日以憑不時清查官府不必另委查盤滋擾

一發倉儲凡倉穀賑貸無法則奸猾佔賴強梁擠奪而貧弱仍無實惠須編保甲時立法精詳如一甲十戶預先分別上中下最下戶等次開列在簿與給掛牌符合無於青黃不接時出貨至冬收納量加息耗一如朱子法其間權歲有大荒小歉計戶有極貧次貧而減免有差及節婦孤寒火災病患情尤可矜者亦可公議減免如有頑戶年豐力充故意拖頑者稟官追穀仍不許再

貸總以裒富益貧酌盈濟歉政不必避加息之名要足備一鄉之緩急而已

一釐倉蠹凡約正約副筦倉務要斂散公平登報清覈為里中服從三年官給扁獎賞并優免雜差以示勸厲如不稱者許講約時里衆公稟選換甚有武斷生事欺

侵倉穀者按法治罪

右社倉法附約保而行雖有限蓄儲未能供無窮食指而鄉有

倉倉有積猝遇災警少覺有備亦足安輯人情即平時同里相周不失敦讓風俗是在因時而力行之將古人不專美于前而疲

恭庶幾有起色乎

蔡懋德通積備荒議

一實在官廩往時收貯積穀多係倉吏圖便折乾挪移
營運凡遇查盤歲覈或以折價貯庫秋成補糴為辭或
因迫限督催強糴不堪充數年年減耗有損無增以致
倉廩日虛有司畱心者非不嚴飭而積習一時未掃今
後凡追應納倉穀務要即糴本色上倉如果青黃不接
或仍折銀初冬實糴或即照穀計筭納米以杜奸胥折
乾侵蝕其米穀亦須設法出陳易新每歲夏季給借冬

初收納不得數年久貯致滋浥爛耗減庶倉廩非空名而備賑有實益矣給借倉穀市民舂杵不便合聽鄉里願領十人同具一券收時量加息穀以補耗減

一勸民間自積杭不產米又俗尚趨末家鮮蓋藏貧民無力可積雜作諸色力能隨時趨食而不事積富厚之家多開典租房收絲蓄貨以取利而不肯積一遇饑饉束手無策甚有愚民游棍家無擔石外競奢華年豐視粟如土交易定勸銀錢曾不思荒歉之日鄰封遏糴始

而價湧繼且持錢擠候無處可糴嗷嗷待哺圖救然眉
雖有奇策無如何矣今後合無通行曉諭保甲牌上懇
切申明此意除貧窘小民不計外稍足之家毋論縉紳
士民在城在鄉常思此際之艱各乘秋成時候隨力糴
積其富戶積至千石保甲公舉覈實報官官為勸獎即
遇凶荒發糶仍照時價官司勿與定價奸民不得強糴
其平時一應民間貿易許令銀米均用使民間自為積
貯之圖而隨予以疏通之法官不擾而民樂勸有益無

損之術也更有一法民間積米百石以上者許令報官
驗實府縣給與樂積良民印票獎勵遇有詞訟當杖責
者執票量為輕重豁免註銷似亦不費之惠

一鼓典舖樂積使典舖積米而責令官糶勉應一時勢
難久遵欲使人人樂積莫若亦許其時價發糶為便非
為典舖省數金之貲也蓋官價之名甚美第行之目前
徒添奸棍擠搶之擾而訛傳遠方復阻米商趣赴之期
況典商算析錙銖惟知營利積米既奉官法發米不虧

私本又何憚而不多積乎更有一法許令民間以物質米以銀取質悉照時價銀米通融蓋窮民質銀仍多糴米過活或全要米或半用銀一聽民便如此則所積之米陸續散出民受接濟之惠而積米之貲還得花息商獲儲峙之利而官府曾無益此厲彼之令但積糴之時務要領批往遠處產米地方販歸實數著同保正具呈甘結以虛數妄報者罪以貪便近揭者罪法在必行彼保身家自知遵守不必另托衙官查覈以滋搔擾如是

而典舖仍貌玩不遵者即繩以三尺亦復何辭況彼自
鼓舞樂赴也

一通行商遠米所云通者欲其舟車飛輓如水流而不
止也昔盧坦為宣歙觀察使歲饑或有請抑穀價者坦
曰宣歙穀少仰藉四方若價賤則商船不來益貴矣因
每石量加十許錢四方聞之爭相輻輳價遂日減此通
商之利也商賈徵貴徵賤趨利如鶩別無招之之法惟
不抑市價無損其利則不招自集矣又有一弊每緣奸

牙猾鋪空手斛其米貨負價任意遷延是以外商束手
耽誤望風畏縮阻於中道隨地發賣米船鮮至米價不
得其平也今後務宜公舉誠實有身家者一人為牙首
許其稽察各牙不係無本之人方許開行接商凡商船
一空即行交足米價令其即行不致久滯如有侵用久
拖者許本商呈官定為追給又請憲臺備行各經由關
權凡糧食重載悉蠲其稅查驗明白船到即發毋久措
畱或有米商夾帶別貨希圖漏稅者三尺自在不得慮

噓而廢殮也又通行曉諭凡屬米船另行優恤決無裝
兵雜運之差勒石各處要津以垂永久如此則外商聞
風四集雖欲遏之而不可得米貨迸轉米價自平矣
一檄鄰封弛禁遏糴之令列國時已知不善況今率土
王民乃忍秦越視乎彼固曰吾以自保其民耳不知遏
令一下奸賈偷行徒飽巡役之壑奸民鼓衆挾制困積
之家致扃鑰善藏本地之米不出截畱強糴行商之米
不通饑民嗷嗷羣情洶洶如今歲蘇常諸郡邑產米自

富一經嚴禁而米價反高打捨屢屢見告遏糴不特病鄰而還以自病此明鑒也至於杭郡上仰食於紹金新私下俯給於嘉湖晚粳而蘇常以及湖廣實為四時不匱之源吳中遏糴甚且截畱楚米是米源已涸武林處坐槁之勢安得不驟然騰沸日增三價乎今議合於平時先請三臺嚴督所轄守令不許禁阻并移檄湖廣應天撫按轉諭各屬盡弛遏禁糧食時時疏通商民兩聽其便庶無米之地自受疏通之利矣

一勸棧房接濟夫塘棲四面水鄉各省直米豆與諸貨物輻輳縉紳及富厚之家皆於此置造棧房或自積營利或召貯取租其來久矣大抵米粟出產有限積囤無窮秋成穀賤則收次夏絲齊則發換易之利積計每至數倍合無因其棧房之便積囤之利勸令隨力加積據實報數在縣或置一簿聽各棧戶認填餘積米若干石除五月間換絲發變外務照原認米數於青黃時候督令湖墅發糶接濟省下饑荒仍照時價不虧原本彼則

總之取利我則借以濟荒又或官有帑銀即令塘棲積米之家領批附糶其人起家斗斛糠粃之間計筭必精駕輕就熟其從必勇而又得借官批庇其私米所利亦不少舳舻銜尾因公及私此誠兩便也

一通常平遺法以廣儲蓄昔朱紫陽以常平倉米六百石計歲盈歉貸民行之數年以原數六百石還府所羨至三千餘石夫貸則有給借之煩有拖欠追呼之患今第即借今歲所發三千金及查帑庫餘金為本每歲於

產米價賤時委廉幹丞簿收積至來歲照時價糶之必有微息逐歲漸增以備荒歉或媿官與民市而必欲減價以糶不知減價之名徒致鬩爭孰若稍收微息多儲新米米多則價自減糶平則人不爭為更便乎蓋地不產米惟貴設法使米有餘不在減省錙銖見德也但今公帑告乏此銀或難久懸更在當事者設處移借耳一復社義倉以敦風俗昔隋長孫平令民間每秋家出粟麥一石以下貧富為差儲之當社以備凶年其意甚

善顧今富民耗於侈靡貧民疲於征求自贍不給誰復肯出一粒以備荒者然亦未有以作興之耳杭俗崇釋每建宇修刹禮僧放生爭捐鏹金立成勝果如鄉約講畢申諭之曰爾輩同里同甲生斯育斯出入相友守望相助何等情誼倘遇荒警目擊餓莩寧忍秦越相視夫建宇修刹何如每里修廩積粟禮僧放生何如同里賑助芘乏其每里推賢士夫為倡或有司稍捐羨贖以興起之令各富戶隨力捐貲修建社倉漸次積貯仍於里

中擇一家殷行篤者為主置一簿聞於有司而平時出入則聽民間通融權貸出陳易新如遇凶荒或煮粥或賑米總之還周一里之急此際所救饑民必真所活生命必衆即是目前真實功德其視捐金布施徼福冥冥奚啻萬倍哉蓋即借彼習尚施吾轉移不特備濟凶荒亦可敦厚風俗矣

湯來賀勸設義倉序昔紫陽夫子特舉社倉西山先生設為義廩皆以萬物一體之心居安而慮危先事而夙

防也丙子吾鄉歲歉吾家與姻友皆施米家大人曰小
惠勿徧何如夙設義倉之為愈也賀心誌斯訓久矣邇
來數遇水旱舊歲稍愈亦非大有年也然而穀值愈廉
者何哉人懲丁亥之饑耕者竭力而戶多陳積也且家
窘戶乏購物無貲而皆以穀為市也戶多陳積故擔薪
可易斗米小民不見有饑似可苟安於目前矣然以穀
市物則可貯日少非如丁亥已前之廣積也家窘戶乏
則無可稱貸非如丁亥之荒猶有族黨親鄰可以相救

援也假令一旦有荒則載道饑民望屋而食雖或自擁
倉箱豈得而獨享哉今春吾邑大姓倉庾悉空矣春夏
之交穀值雖廉而時聞饑殍幸秋霖優渥差可補救而
食猶未足也茲遵家大人夙訓徧懇有仁心者互相鼓
勵各設義倉以防饑饉在城居者或設倉於祠堂以調
宗族或設倉於近境以濟鄰人在鄉居者或各堡創設
之或一都合力為之每歲秋成各出穀輸倉或拾餘石
或數石或數斗隨其心量其力委曲勸勉而不強人以

所難雖所積無多而荒年得此猶愈於未設也每歲初夏必出陳易新則無積久成塵之患矣擇本地與宗族之誠恪者司其散斂每歲輪流則可無侵用之弊矣小荒則減價以利農大荒則商於衆而酌給之先給孝子順孫義夫節婦之窘乏者次則老羸之無告者次則良農之缺食者惟不孝不友敗常亂俗事確名著及遊食不事生業之人咸勿給焉此倉一舉可以免溝壑可以杜爭奪可以睦鄉鄰可以維風化利莫大焉繇此推之

則凡慶壽者求嗣者禱病者何不出穀以酬所願則轉
無益為有用化虛文為實利不亦善乎王文成曰為善
之人非特宗族親戚悅之鄉黨鄰里敬之雖鬼神亦陰
相之夫所謂為善孰有大於賑人之饑救人之命哉今
慶壽者若能以濟人為稱觴之祝則自求多福知必壽
考且寧也求嗣者若能以救荒為續後之謀則天監在
下知必子孫千億也禱病者若能以調人之饑為悔過
遷善之圖則神聽和平知必勿藥有喜也移請客數宵

之費師巫一夕之貲於以救數命不充然有餘哉昔楊
旬每遇荒年輒貴糶賤糶以賑貧民後其子楊椿遂魁
天下陳天福平糶濟人而子孫咸登顯要遂為湘湖世
家昔人有云予舊館於當湖陸氏見其堂中一軸文乃
先世兩代出粟賑饑而人贈之者文中歷叙古先濟饑
之人子孫皆膺高位謂陸氏他日必有顯者今日東濱
公而下三代皆為九卿其言若左券矣來賀讀家譜先
祖民悅公月軒公父子賑饑不遺餘力而讓能今子孫

數世亦著文名矣夫楊陳諸君子豈有心於求福哉然不求福而福自至亦足徵為善之顯報矣吾鄉親友嘗思六月大旱情形則不忍不為之豫備况師紫陽西山咸以萬物一體為心則不因無報而不為惻然亦豈因有報而始為躍然也哉

一每歲將秋成即委曲相勸稍有衣食者各出穀輸倉隨心量力不得相強以致嫌隙

一本村有孝子順孫義夫節婦聞其真確者若屬家貧

每歲將穀送與其人每家各幾石秋成免還若小荒各奉穀若干大荒各奉穀若干就所積之多少為所饋之厚薄急宜行此以見勵俗維風至意

一地方或有不孝不悌著名者及犯倫傷化逐出祠外者及游手好閑不事生理者縱貧亦不得給借縱荒亦不得賑濟必須嚴拒以端風化以警遊惰

一穀久必乾且有鼠耗每十石必筭折數四斗以免賠累

一凡生日或子為父母慶壽或孫為祖父母慶壽其尊人好靜不喜飲酒請客則為子孫者隨力隨意入穀義倉以祈神祝壽此實福也親朋送禮而主人不肯受者亦不妨隨分入穀代為祈福古人有放鵲縱魚以祝永年者況活人之命乎竊見鄉間糶穀以買禮儀何不即以穀送較穀儀侈費省錢省力所益更多一凡求嗣許愿者即於福神前拜謁倘得生子即入穀若干於義倉畱為賑濟以謝神祐及生子後即以湯

餅之費糶穀入倉或請客情不可缺即減其酒肉之半以助義倉於是神前焚一疏文以酬願信可也即親朋以穀當賀儀亦有裨於實用

一凡有病祈禱者即於神前發願拜許病痊之後入穀若干於義倉畱為賑濟以謝神祐及病愈身安即於神前焚疏入穀以酬願信只隨心量力不拘多少此實實功德較之建醮演戲功德不啻十倍

一義倉每年拈闔輪管筭清量過上手傳下手接管必

須素行忠信又稍有身家之人方許承管若家力甚
貧縱有忠信者恐其急時那散不得徇情與之輪管
庶無侵用而事可久行

沈蘭先社倉議 每里各設鄉約取私剝寺院改造里
中推年高有德誼者一二人主之或老鄉貢耆儒老諸
生皆可月朔則召民講諭讀法教子弟以孝弟廉讓即
於其後為倉房高其牆垣每遇收穫時聽有田者各捐
米一石以上至於十石封貯之多寡從人不以相強此

不過省數日宴會之資無益之費即可救異日數人之命近多見士紳廣施僧尼益造佛殿不若貯倉粟為救荒備功甚大也里中貧富高下戶戶幾人作何生業立為冊籍以時稽察其子弟馴良及無賴者皆如燭照有不肖者訓飭之召其父兄俾董正之必不可教者署為兵亦可弭盜戶有籍則姦宄無所容又即寓保甲之意遇凶年則按籍而稽其極貧戶若干次貧戶若干在本里所熟悉其稍有體者月致米若干下戶貧不堪者人

給米日一升按冊三日總發男子一人頷之不須扶老
挈幼而至如此亦可省挨擠之苦凡社倉每里一鄉約
則一社倉倉粟賑其本里之人或本里貧而積少旁里
積多遇凶年則以富里所積分賑之務期公同協於義
毋私所有鄉邨慮盜劫則大戶家撥一人守之許備木
棍剛叉之類人多吝於私財不肯捐積不知當荒亂時
盜賊蠱起劫而去之則私財亦非其有然則社倉正以
保富非獨安貧也其有豪富慳吝不樂為義者里中共

糾之罰令出粟倍於常格每鄉約立約正一人

或二人

副

二人倉穀出入悉聽正副冊籍用約正鈐記此法徧行當無流民即有流移以官府之常平賑之天下無餓莩矣但恐今日不能遽行此事別為酌法如左

欲立社倉必先立鄉約講明德義人皆樂輸又為法簡便易行如鄉約未能立仍須勸置大凡勉強之事一時即或奉行久之終歸廢壞社倉之舉願入者書其名不願從者聽倘官設印簿使里遞沿門勒書則與科斂民

財等不可行也今先就數里樂行者任募於一里之內
設為一倉或兼數里之衆統立一社收者散者持籌者
糴糶者各俾自便官不與焉鄉間願入社者行每畝出
米二升之法城市無田有業願入社者則可行每月出
銀二分之法其好義自肯多出數十百倍者任之尤多
者里人言於官官為給獎嘗謂民間醵錢斂分嬉戲其
無益之費不少惟茲社倉纔減百分之一以輸之當社
設遇凶荒即以備本里賑濟而起人溝壑之中不過出

平日升斗中一粒耳且仍以本里之米應本里之需積之數十年之久俾吾父老子弟永無凍餒流離其為利賴無窮矣社倉之法人不樂行者有故總在收貯於官設遇饑饉以還民猶費上納之苦況當賑濟小民未必實沾其惠即如文公遺法始行甚美其後行之不終額定報數無異正供之徵收歸官督催頓失大賢初意以至徵募之先人不樂有大戶之名恐將來本里有事得指名妄報雖有仁心廢然自沮積蓄之後又恐官府那

借將農夫手足胼胝民間錙銖積累者一朝烏有則遵行之念又息若能斟酌可否因事制宜使通行於今日無貽害於將來則大善矣

朱子社倉初行時貸常平米六百石今使倉本仍貸於官恐日後操縱亦聽於官而流為民害總之行於官府者則為常平不必下涉於民行之民間者則為社倉不必上經於官宜聽民間自為積散所煩憲禁具題者凡力行社倉處永不科派大戶決不官吏監督決不經由

查盤而又官司不得借貸支動經過軍馬不得强行占
取更或姦蠹蠱惑有司擾民紊社者定以某法某例則
積之艱難者不至罄奪於一旦民志既定自不視為上
官苦我之事而各為桑梓身家計矣有田者當極荒之
歲亦多艱於舉粒設使平時舉所有以入社倉荒年但
以散之他人而已則坐視無有未有不嘆社倉之法厲
已矣今更酌為融通之法平時所納幾何具有冊籍設
遇奇荒之歲中等之家仰貸無資者照數撥還社倉原

積至豐年如常量行入粟永守社倉良法既經此一凶
荒一周接人家親受其益有不樂行者乎無有也其不
願領歸原積者聽存貯本社以濟本里極貧之民及惠
孤恤寡之用此社倉一法猶之民間結會積錢或三五
十文或千百文貯之一所及歲終始出而瓜分之亦各
如所輸數還歸之則出之最少而力且易為得之頗多
而更適於用頌言其利而無害自然鼓舞樂行也每見
豐穰之時人家得米多便不珍惜或以飼鶩或飽食

而棄其餘暴殄者必有天殛何如積之倉者為有益乎
社倉之行全賴得人為理但里社不能皆有可任之人
喜事者未必堪充而堪充者未必喜事若使經官開報
遂為官身每有守候謁見之勞而無復優待之禮有品
望者自不樂為此必同里自相推舉始為無弊賢鄉紳
主之於前素行忠厚老成廉潔者佐之於後并心同力
謹其出納以杜姦欺則社倉可行矣

社倉既立其有仁孝節烈孤寡無依者里中時行周給

不待凶年

後數條即前一條意也稍異者鄉約之立不立及每里一倉法耳然鄉約之行易於社倉必舉鄉約其美始全鄉約舉則每里社倉亦舉矣通前後法酌而行之庶有益乎

荒政叢書卷十下

欽定四庫全書

荒政叢書附錄上

湖廣布政司叅議俞森撰

鄖襄賑濟事宜

示諭饑民

為曉諭饑民事照得汝等饑民因本籍災荒遠來襄境自夏迄今日見其多昨閱各州縣造送清冊比夏間多至十數倍而又有日日續到未及上冊之人本道不勝

慘然總由此處不忍驅逐以致來者日多念夏秋之時
田禾在野農工正興汝輩僱工覓食資生頗易及至今
日田禾收了農功完了無工可傭有食難覓奈何奈何
且襄陽地方田地荒多熟少米穀出產有限每年只勾
本地吃用今年雖然有收但添了汝等往來居住每日
約萬餘人口糧又兼河南陝西地方米貴販戶多來收
買襄陽總不禁止以致去者愈多市價日貴夏秋之際
每石只賣三錢如今貴至六錢七錢若使饑民來者不

止販戶買者頻來不但汝等沒飯吃連襄陽人也没飯
吃了奈何奈何汝等在本籍受饑餓愁死亡是你本籍
官府的事今在襄陽是襄陽官府的责任如今意欲賑
濟官府並無此等無碍米穀意欲勸賑襄陽地方没有
富戶除非指望官府奈官府之俸俱係除荒我本道每
年止得俸銀三十餘兩其餘官府可知又無俸可捐矣
本道為汝等再四躊躇日不安坐夜不安眠細細思量
要在無可賑濟之中再商救濟之法只有借動常平倉

糧一法但此倉糧不但本道不能作主連督撫大老爺
也不便擅發一有動用部議必不肯依處分立至賠累
不免今本道盡力救濟汝等懇懇切切詳請兩院咨部
題本畢竟要那動賑濟以活汝等此係本道一片切實
心腸汝等須要仰體安心靜守將就度日即使一時不
能接濟一頓分作兩頓吃一日分作兩日用等得批允
下來便是汝等造化也完本道一片苦心本道又聞府
城之外一二十里地方天色昏黑孤客獨行多遭悶棍

雖未必確係饑民所為但從前無此等事今忽有之焉
得不疑及汝等汝等千萬謹飭毋作非為要緊要緊本
道昨又看見報上

皇上已發二十餘萬帑銀向陝西賑濟大人小人計口
散米又且蠲免錢糧汝等若不離家此時正好安穩過
日何消本道為汝等焦勞今汝等已來在此處也無可
奈何但該傳語同鄉人等願在此者安心耐守如願回
鄉者趣此早回其行走途者勸他回去未曾出境者

寄信阻他不來又且襄陽地面居住太多米貴人窮彼此受累又須散處各境方可養生總之做官的人未有不愛百姓的見汝等這般光景未有不動心的只是事體煩難勞心喫力汝等未必得知故示須至示者

詳請賑濟流民

為饑民之流來日多窮黎之凍餒堪憐謹陳憲鑒亟施拯救事據襄陽府呈詳到道據此本道查看得襄陽一郡北連豫省西通秦晉誠南北之要衝也今年秦晉災

荒流民轉徙盡到襄陽而豫省之來者亦有其人夏間
始來入秋而盛至冬而多其所以盛且多者緣他處皆
嚴於驅逐而襄陽聽其居處加以安插所以聞聲而來
盛且多也本道自流民初來之始以及於今時時飭令
有司撫恤稽察挨查造冊除冊報憲臺者約萬餘人造
冊後續來者又萬餘人至若每日稽察則有暫住數日
另投他所者有暫過止宿明早即行者以是而計則每
日不下數百人矣本道細思此等流民雖非襄陽之赤

子要屬

朝廷之赤子原籍無以為生故投之他所今至他所而仍無以生之則惟有轉死溝壑而已矣轉死溝壑而在本籍本籍官吏之罪也在他所則他所官吏之罪也為朝廷之官不恤

朝廷之赤子可乎但夏秋之時饑民之來猶少也襄陽之米價猶賤也且農務方殷需人力作傭工覓食猶可分給也則其安頓也猶易今則來者日衆矣市上之米

各省搬運義切救鄰全無過糴出產有限米穀漸空而米價倍增矣農功已畢歲晚務閑傭工覓食之路又絕矣如此而安頓之則難將欲開倉乎無無碍之米穀也將欲捐賑乎襄陽土瘠居鮮富民官於此者俸悉除荒以本道而計每年止有俸三十兩而府縣各官可知矣此即盡捐之何足以當流民數日之饘粥耶再四思維唯有兩府屬重農積粟等事米穀三千一百三十石零及積貯天下本計等事案內米穀十萬五百石零積貯

倉可以動給但山僻遠水窮苦地方不便動支外惟襄陽府襄陽棗陽宜城光化穀城均州并襄陽衛八處重農積粟案內共穀一千七百八十石零九斗四升積貯天下本計案內共米一千三百六十石穀七萬八千一百八十石可以就近動支然思此案之米穀固為本地賑濟之需者也現奉憲行稽查有無虧折浥爛又奉部文有加謹收貯之行者也本道一思之以為可動矣轉思之而覺其不可也再思之又以為可動矣展轉思之

而愈覺其不可也正在躊躇而饑民之號呼於各州縣者纍纍矣縣詳府府詳道而所可議者亦惟此兩案之倉穀矣夫人情當危迫之際瀕死之餘見有立於其前者雖甚不關切之人莫不號呼而望救而况於官乎此饑民之所以哀控也不哀控則死亡矣凡人之見其危迫瀕死而求救者雖不關切亦莫不痛心疾首而思救之而况於官乎此各州縣之所以申詳也不申詳則唯有視其死亡矣方今

皇上仁過堯舜匹夫匹婦無不欲其安全得所憲臺如
傷念切訪民疾苦而噢咻之乃使有流民數萬濱於死
亡諒非盛世之所忍也縣已詳府府已詳道而以其事
之難行不為轉請則是萬餘流民之濱於死亡非州縣
之罪非府之罪而本道之咎也且本道細為籌畫合應
遵照陝西賑濟新例每大口米三合若賑穀應給六合
凡流民萬人每日應給穀六合每萬人每日需穀六十
石十日六百石一月一千八百石計自歲內賑發至明

年三月盡農功既興民可傭工可覓食而止約費穀七千二百石耳即多至四萬人亦不過二萬八千八百石以穀二萬八千八百石救流民四萬人頌

皇仁而仰憲德豈淺鮮哉今若惜此穀石則此輩流民必至死亡是國家失民四萬人矣况此四萬人之中有狡獪者有剽悍者不安於死亡小之劫奪大之嘯聚是又豈止失四萬餘人哉故自其後觀之則費此二萬八千八百石者乃所以為

朝廷愛惜錢糧萬萬保護生民萬萬而自今日觀之則
唯見其費此二萬八千八百石干部議罹處分而已矣
革職追賠而已矣伏惟憲臺念生民之危苦審

國家之大計為先事之圖不貽後日之患於本道詳到
迅賜批行迅賜咨題准其動給倉貯穀石以贍饑民則
饑民幸甚地方幸甚國計幸甚倘慮部議以此案穀石
既動本地饑荒反無以備則又請憲臺咨明動支之後
准於楚北各州縣量其積穀之多路通舟楫者分撥幾

處穀石以補之官為捐備水脚以運之總屬

朝廷穀石裒多益寡總為生民何分彼此若必謂不可
通融或請於襄陽暫開外省生俊援納之例不及百人
即可補額是雖動二萬八千八百石仍如未動也此亦
何憚而不為哉本道目擊情形不能緘默故敢冒昧倘
憲臺親臨此地聞此呼號其疾首蹙額中夜徬徨者又
不知若何矣今本道既經繕詳之後恐憲批不能緩待
擬即一面開倉宣揚

聖天子仁恩憲臺德意照人數給發以慰衆望其或有
應委曲周詳審慎立法以期惠澤必周者又望憲臺立
刻賜示古人云救焚拯溺情實似之耳事關請賑饑民
言長句冗除應行事宜尚在細酌再報外合先備叙未
敢擅便伏候憲裁

再詳賑濟流民

為急廣

皇恩以救垂死避荒饑民事竊惟堯九年水湯七年旱

自古聖王之世水旱之災亦時有之今逢

堯湯之主在上綏邦屢豐遐方異域

皇仁所被無遠弗届凡有水旱小災外吏每每未及奏
聞水旱之形未見

皇上無不先事豫圖屢免直省錢糧發帑發粟幾無虛
日

欽差賑濟不絕於路上有

堯舜之主則百姓盡皆堯舜之民一夫不獲其所時勤

聖主之憂為臣子者敢不曲體

宸衷恪盡厥職今年山陝河北饑饉又楚省鄖襄兩郡
夏秋之間旱蝗已成本道督率屬員修葺塘堰虔誠祈
禱幸時雨忽降枯苗立生飛蝗蔽天立即盡斃變荒為
豐年稱大有米麥頗賤以致山陝之民聞風而來者日
多一日竊念鄖襄為湖南北之上游實陝蜀豫之門戶
萬山險峻地瘠民貧兵燹之餘人稀土廣豐年僅可餬
口凶歲難保流離本道身膺兩郡重寄日夕憂懼手輯

農政荒政二書嚴檄兩郡州縣大講水利招徠開墾務使水旱有備可免災祲而外來就食饑民一一安插力能墾荒者擇地任種貧不能存立者勸土著之民令其收養皆具保結存案以便稽察其願往他所依傍親識者量給錢米聽其自便但地方既窮官民又窮來者無盡揀濟有限普天之下盡屬

朝廷赤子何敢作秦越之視糧食一任陝豫糴買不忍禁遏除兩屬薄收僅可自給此外惟襄棗宜三邑有收

而為數無幾鄰省駝運車盤晝夜不絕糧價踴貴今已
五倍襄民自食將盡既無以應外省之販買尚安有餘
粒以濟寄食數萬之流民耶本道計無他出惟有不顧
一己之身命仰體

皇上軫恤赤子之德意將現儲倉穀暫行給散救垂死
之流民全本土之黎庶靜聽處分實亦無悔謹具末議
開列於後

一現在安插之流民急宜救濟也除暫居今去者二萬

餘口不計外并續到未曾冊報者不便懸擬其現在入冊者約萬口本道照陝西賑濟新例大口米三合每口先給一月除小口不算外計穀一斗八升約應共給一千八百石

一續到之流民急宜安全也外省流移不便安插城內止宜散之村鎮民居草屋實無閒房可以強令收畱借住况現在安插於僧舍者俱已盈滿驅逐不可收養無地露處豈是長策棚屋無力捐蓋惟有按日計程約畧

賑穀令其他往

一安插流民宜審地勢也鄖襄兩屬惟襄陽光化棗陽宜城四邑可以安插其餘山邑險隘不便安插并宜嚴禁防守不許流民入山

一安插流民宜散不宜聚也本道所轄地方止襄光宜棗四邑稍可安插其餘別府屬必求憲臺裁示某府某州某縣可以安插若干本道擬於均光境上出示曉諭委員稽查給票赴襄驗明人數濟以口糧應安插某州

某縣者換票令其前往到彼安插一面具單報憲一面
具單申道倘中途或有疾病死亡所在給棺掩埋標記
如此施行則流民無失所之虞雖有奸宄逃盜亦無潛
踪之所暇過人數亦無所容其浮冒矣

一單式宜詳且明也某官為查驗事本年某月某日查
有某省某府某州某縣某里人某某年若干歲父某母
某氏兄某弟某妻某氏子某女某各若干歲共幾人於
本年某月某日由陸路自某處來歷某府州縣到此驗

明合行給票前往某處查驗換給刻板印填最為簡便
一沿途大路於往來必經之處該州縣委一勤員查驗
給票隨到隨行不得稽阻

一隨地分揀不過一時權宜之策殊非經久善全之道
陝西避荒之民惟臨潼為最甚本道逐細詳詢有一生
員惠古慟哭陳情云本地顆粒無收旱荒已極不止一
次

皇上發帑賑濟官府皆按籍給散某戶納一丁錢糧

者止賑一丁而已若給銀五錢正好買糧食一斗生員
一妻四子共計六口一斗之糧四日便了此外何以支
吾富者有銀無處買糧貧者無以存立十分之中已逃
七分田地拋荒家業盡棄本道聞之深為駭嘆徧問多
人如出一口真偽或不可盡信但恐逃亡既多耕種人
少耕種既少安得豐收無收何以有年無年則逃亡者
何時還歸故土故土既未可歸異鄉豈可久處本道割
切呈詳即求憲恩入告

皇上下沛恩膏開倉發粟然賑濟不過數月數月之後何以接濟必須故土盡招來之術使逃亡可以速歸長途有餬口之糧庶不致父子離散

一饑民之來每日動計數百少亦不下數十驅逐安插惟有兩策若任其自然聽其所之此掩耳盜鈴之說奸吏舞文欺飾憲聽耳夫流民饑無食寒無衣散入山谷則所憂甚大伏匿荒僻則行旅維艱小則鼠竊大則夥盜勢所必然故勤幹通達之吏熟悉地形事勢計深慮

遠安插不能容畱不可乃不得已而從事於驅逐使出
他境則本州縣無他虞矣其塌葺聾聵者土木形骸痛
瘡不關不行驅逐自謂安靜實亦無毀無譽第恐相率
效尤禍機隱伏本道所轄兩屬共計十三州縣率皆深
山邃谷勢既不可任其所之法尤不容使之驅逐第無
米之炊如何措手今安插已多無地可容矣鄰封競糴
流民充塞穀日貴糧日少矣貴者日貴少者日少無奈
來者日多不肯他去號啼遍野慘不忍聞此皆

朝廷赤子何忍坐視其死而不救乎惟是冒罪發倉粟以賑濟為數無多無以為繼且賑濟一開留者久留去者不去來者益來不可窮極是救一時之餓殍實釀無盡之禍胎斷須剗切入告動計萬全速令各歸鄉井官民兩便

一饑民之逃亡宜重懲有司也無雨則旱久雨則澇事須預籌有備無患百姓逃亡守令之罪也流亡之民隔省遠徙非工於驅逐即視等越秦嗣後將荒不能預籌

已荒百姓流亡者流亡之民鄰近地方不即分任安插使之越州過府者痛加處分盡心安插者優其陞擢則賢者益鼓舞而不肖者亦知儆惕百姓實受其福矣

一本郡捐納之例斷不可泥也地有遠近肥瘠民有多寡富貧豈可一概定例肥邑則民富本地捐納有司措勒索使費拜門生有禮送旗送匾有禮煩費浮於穀價弊一地瘠則民貧民貧則餬口不充誰來捐納即以鄖陽一府而論捐納者寥寥無幾按冊而稽率皆外省外

省既停捐者絕響此地瘠民貧之明驗也弊二天下州縣若鄖陽者恐復不少此必須仍開外省捐納之例庶幾倉穀廣儲倘遇荒歲賑濟有資伏乞裁奪

一饑民之妻子宜嚴禁沿途販賣也流民救死不暇賣妻鬻子愚人以為兩全之道不知骨肉分散慘動天地富貴之人利其賤值而買之奸徒賤貨而貴售嗟乎傷哉為民父母離者尚欲使之合散者尚欲使之聚今每日車載騾馱不知凡幾幼穉子女動輒數十此皆

堯舜之民也宜題明嚴禁痛加處分

一計流民每口給穀六合一人先給一月計穀一斗八升百人用穀一十八石千人一百八十石萬人一千八百石呈詳批發便須一月具題候

旨便須兩月必須預籌三月之穀方可苟延殘喘但流民急宜分插立望批示

以上數條皆因目擊流移之慘效其一得但智識淺短思慮未周未必足供採擇相應備叙恭候憲裁

三詳賑濟流民

為移明䟽通糧路以救災黎事本年十二月十二日奉
總督巡撫部院憲牌准川陝總督部院葛谷開陝省地
方今歲荒歉秋禾失望明歲麥苗枯槁將盡斃斃百姓
全賴隣省接壤州縣往來糴販以有易無在秦中饑民
可借以資生楚豫居民以此獲利實屬兩有裨益近聞
楚省隣秦州縣不許秦民糴販以致秦民資生無策相
應咨請轉飭所屬隣近陝省州縣各官如遇秦民來彼

糴買糧石令其照常行走公平交易不許盤禁阻撓使
陝省災民得免饑餒之虞等因准此為照各省百姓均
係

朝廷赤子凡值歲時荒歉自應聽隣省災民往來糶糴
以濟時艱無容姦民遏糶藉端阻撓今准前因合行出
示曉諭示仰督屬軍民人等知悉嗣後如遇秦民來楚
糶買米穀聽其照常往來公平交易不許生端盤禁及
高擡時價刁指阻撓敢有故違許被指之人赴該管地

方官陳稟查拏解究以憑重處各宜凜遵毋違等因除
出示曉諭外合并嚴飭為此牌仰該道官吏照牌事理即
將發下告示照抄多張轉發所屬遍貼通衢曉諭仍令
各具遵依徑報查考毋違蒙此看得不許楚省遏糴使
陝西饑民乏食此實川陝督院為民至意然不知本道為
民苦心今年襄陽仰賴

皇上洪福兩憲鴻慈變凶為豐時雨立霈枯苗飛蝗入
境即死幸而有秋以致陝西河南紛紛赴襄糴販車載

騾馱驢運人負駱駝百十為羣晝夜不絕於道府縣職
司民牧未有不為自己地方起見此亦良有司之苦心
也但念天下之民盡屬

朝廷赤子何忍閉糴阻饑本道多方勸諭出示布告令
其毋逐利以忘本謀出有餘以濟不足數月以來襄陽
之粟流通三省且三省之民就食於楚過襄不畱者不
可勝計其暫住及久住者亦不下三四萬人襄屬地廣
人稀山多土少稍有收者止襄陽棗陽宜城三邑以三

邑荒薄之收既供三省之販運又食數萬之流民襄民
蓋藏幾何只顧目前蠅頭微利忘却餬口本謀不獨官
不忍禁即禁亦不能止也今流民就食益衆饑疫之民
男婦老穉千里跋涉枵腹徒步無不羸尪投襄即止非
不欲他往也足力實亦有不能舉動者矣來日益多粟
日益少價日益增粟日且盡昔不忍于外省之民饑今
深憂夫本境之民餒矣本道愚昧無知心力已竭憂深
慮遠食不知味夜不成寐欲奮不顧身擅發倉穀自顧

赤貧向在河工二十年捐築高郵城南三十決口代賠
大工窮夫逋帑隣工堤潰黃水灌淤本道新挑運河七
千餘丈又復獨力重挑負累親知家徒四壁空拳赤手
粉骨難賠又涉市恩沽名且恐一發難繼遠近聞風來
者益衆古諺有之善不可為蓋謂是與然畏首畏尾瞻
顧因循釀饑坐斃與其不可救藥於後何如深思熟計
於先絜輕校重害少利多本道計惟有哀懇兩憲俯念
垂斃之流民將困之襄屬大發鴻慈廣勸輸助除郟襄

兩府官民窮苦無力輸外其餘悉力輸助保襄民實以保流民寧襄境實以寧全楚也一面即求憲示將續來者速檄別州縣分頭安插毋使偏聚一方一面本道先借倉穀稍給十五日之糧苟延饑民殘喘俟輸助到日補償并候憲示到日再行續給一面再准本道將各屬邑倉穀酌量發出平價糶賣銀收在官俟來年麥熟米熟照數買補還倉一轉移間不獨可保襄民流民之困且可以稍甦隣省之乞糶矣伏乞迅賜批示以便遵行

稟覆督院

某身在鄖襄凡一切巨細之事無不切實料理而饑民一事尤關重大何敢膜置計自夏間流民初入境即諄諄告誡有司安頓存畱勸諭本地居民加意矜恤又曉諭流民安心棲止文告案牘不一而足其時以為不過數百流民力為安插使無失所足矣何敢以小事而張皇何敢以微恩而沽名又何敢以襄地撫卹流移而使外省有人民逃散之咎故爾未瀆憲案既而九月間自

省歸流民漸多焦心益甚飭令各屬清查流民多寡之數商量賑救流民米穀之所出早夜攢眉檄催如雨無奈各屬遼濶流民星散冊籍一時不齊不知多寡其賑救之數不能遽定米穀所出無可指實又以大計遠赴會城遂致遲遲未得轉報及十二月初二自省回襄流民愈衆寢食不寧親自延問流民細訊逃來之由與今居處情狀每聞哀訴涕淚交橫又復飭安頓飭清查星催火促襄屬之冊甫到而郟屬任催不至雖地方之遼

遠亦郡守之怠緩不暇候齊隨即攢造送憲案矣既得
流民約畧之數苦思力索始得借動常平之策而郡縣
詳至隨即星飛請憲示矣某又展轉思維計深慮遠細
分條例不徒務虛文而求實濟不徒博善名而銷禍萌
不徒慮目前而計久遠亦不徒為一方奠生民而為天
下講吏治又已差投憲轅第未識芻蕘足當採擇否又
念郡城情形洞然可見各邑之安頓與否得所與否又
或驅逐與否不能盡知於本月十八日親歷光化一帶

問民疾苦務得實情以圖救濟擬即先動倉穀賑濟半
月俟憲批示再行正在巡歷憲使適至仰見憲臺軫恤
民艱雖遠彌切一使之來流民感動此真如傷念切已
饑已溺為心者矣但某數月焦勞惟此流民一事前此
未經仰瀆恐終難達憲前或者勤事而人言以為玩忽
安插而人言以為驅逐亦未可定謹將流民一事除近
日具詳數案外其從前文告繕錄一本呈電至其確實
情形與未盡事宜俱悉憲使口稟某惟有仰體憲意切

實奉行以盡厥職而上慰憲慮耳鄖屬惟竹谿縣有冊
續到候諸邑冊齊再報合并聲明

上兩院稟

前以計典在省時親憲慈飲食教誨感激之深銘諸肺
腑星夜回襄已是臘月初二日繼以新鎮初到酬應兩
日其為人明爽透徹相與共論地方情形事宜種種應
心不啻水乳鄖襄重險

皇上簡畀得人憲臺臂指有賴地方之幸亦某之幸也

襄鎮二十長行某恐其

陞見或蒙

皇上問及是以星馳至光詳細陳述某遵奉憲指施行
廿四旋襄新將軍亦止宿郡城瞻其色笑和平溫厚真
地方大慶也秦省流民久檄各屬安插得所勤幹者隨
到隨行鄖屬則竹谿房縣鄖縣襄屬則均州光化宜城
真翹楚也某拘於程墨不得不候齊彙報而鄖守尚無
一字回覆某分檄各縣令其兩申道府是以流民冊子

先將襄屬呈報而鄖屬續到不及候齊無奈積疲之餘
一時難以速振也饑民自初秋即來楚境率皆過而不
畱畱亦稀少旋令具結以杜奸宄此皆職守常分無庸
申稟後某自省旋襄隆冬生計乏絕秦省民既流移而
催科未緩貧者既行富亦隨之臨潼一邑十走七八某
時赴襄邑大路要口團山鋪陳家營等處坐於道旁逐
一細問無不慟哭陳情如出一口他邑皆然臨潼特甚
後至流民訪前至者覓主收畱前至流民招後至者來

此覓食地界相鄰來者日衆其職在分守既不忍其流
離失所尤不敢以安插賑濟虛名集衆釀禍慮前憂後
寢食俱廢今秦民來者無窮襄米去者將盡土著無以
資生流民何以度日此號呼求賑之所自來也某策騎
親歷鄉鎮集民路衢勸諭備至以秦民來楚即為吾民
不可異視楚民家稍溫飽果有餘糧可至麥熟者量力
收畱令其傭工耕種挑水擔柴或有空屋薄取租金廣
行方便蓋秦民向來居此貿易原多是以親友識認者

望門投止安插稍易保結不難新至者恃久住者以自
安土著者恃久住者以取信嚴其禁約不使土著欺侮
流民尤不許新來者恃強撒潑安分則樂業茲地為非
則出諸境外可以自食其力者將就度日苟免死亡如
饑寒迫身朝不謀夕者地方據實報明備述

皇恩憲德給穀賑濟復將遠糴米石來此以備秦省轉
運嚴行各屬正印雜職佐貳分頭曉諭分別查明散給
錢穀數日以來民心大定無復哀號者矣但安插在境

者逐名給散固易即給後稽考亦不難若信宿即行過而不留者若不賑濟似非一視之仁賑之則去來莫定多寡虛實無從覆核徒開虛冒無有實濟似此之類每多慎重某矢諸天日并諭各縣凡一切處分賠累俱本道一身獨任不累汝等絲毫惟望竭力盡心毋沽名毋浮冒毋短少毋任胥役真如自己饑餓一般倘假借一粒神明不佑各令亦皆歡放鼓舞而均州光化尤為勤慎俟其確散畢報某必須遍歷親查分別勤惰誠偽報

憲勸懲大要分別確實所給亦自無多有食者不給則
絕妄覲之心無食者霑恩則免死亡之懼此則襄屬各
邑賑濟之大畧也至鄖陽各屬地險山深稽察不易而
地亦貧瘠無以養生流民非親交因緣不至其地至亦
不畱故凡流民之在鄖境者皆可苟延性命若一倡賑
濟之聲恐其轉相號召襁負而來接踵而至所集愈衆
資生愈難賑不能徧兼不能繼崎嶇險阻移粟不能貧
餒聚處解散無術為憂方大其遠慮未敢輕舉憲臺視

遠惟明神謨畢照惟望指示導其不知教所未逮庶得斟酌妥當次第舉行某束髮授書今年已五十讀聖賢書所學何事敢不盡心以報憲知以慰民望即前見事勢迫切憂深慮遠剴切敷詳今復確得情形細加酌量嗣後或有所陳容再繕錄呈電

與襄陽王鎮臺書

山陝河南饑民流入襄境自八月至今過而不留以及各縣安插本道勸襄民收畱安居者有數萬餘人山邑

不便安插恐生他患襄雖薄收僅可自食土皆

皇土民皆

皇民如何可分彼此自秋至今三省糴販不絕於路買
去糧食不可勝數饑民就食又多襄屬糧食將盡米價
騰貴小米已賣至七八九錢矣計至麥熟尚有四月不
但流民乏食襄民亦乏食矣豈不大可慮哉今隆冬歲
暮流民嗷嗷待哺號呼遍地慘不忍聞本道見邸抄中
皇上發帑賑濟陝西夫陝西在家之民猶可支吾其逃

出者苦且十倍今仰體

皇恩擅動倉穀先賑一月遍諭饑民此皆出自

皇恩數萬人感頂

皇仁歡聲動地然必須給至麥熟或多給此有資生之
策可以歸還故土方是長策老鎮臺與本道同守此地
痛癢相關今入覲

天顏恐

皇上一時垂問伏望老鎮臺啓奏使陝西在外流民與

在家者一體霑恩再給路費使可還里陝楚生靈受福無量矣

嚴行保甲

為嚴保甲以申憲令事竊照保甲之法奉憲飭行久矣奈官民視為故事全不實心遵行今外省饑民流寓道屬甚多合再嚴飭為此牌仰該府即便轉飭屬邑令於在城在鄉處所家給一牌十家為甲立一甲長給以十家總牌一紙十甲為保立一保長給以總牌十紙十保

為里令其造具清冊二本一存家一送縣縣造二冊一送府一送道甲保里長皆須誠實公正者為之止稽造本甲內流寓饑民逐一填明該縣預給單式小封凡續到者即日具單徑行傳送本縣倘本甲有容畱來歷不明及遊手無業之人左右隣察出即報甲長照前申報如此力行則官民不擾地方寧靜流民得所賑濟周遍矣務期實心遵行毋得怠忽并速出示曉諭定限三日造冊申送毋違

禁宰耕牛

為禁宰耕牛以重農本事照得本道所屬郡邑民間耕種全資牛力去歲牛疫死將殆盡國以民為本民以食為本牛少則不能多墾矣合行嚴禁為此示仰道屬軍民人等知悉如有宰牛者隣佑舉報保甲保甲即報該縣立拿解道治以重罪仍罰十牛散給窮民之無牛者如不舉報訪出隣佑保甲一體治罰決不姑貸此係為爾等百姓籌畫至意非苛刻也倘有借稱牛病不能耕賣

以另買不知病牛之肉食之殺人牛為爾家力耕致病
賣而殺之神必降殃爾等宜知又回回除禁忌外可食
之物頗多何必食牛若私自宰賣隣佑保甲舉報如前
俱一律治罰斷不姑寬慎之

曉諭饑民

為曉諭事照得鄖襄地廣人稀荒土居多邇來外省饑
民流離至此不下數萬又陝西河南山西搬運者絡繹
不絕普天赤子皆屬我

皇上之百姓豈忍異視半載以來本道所轄地方並無
過糴之禁而川陝督院移文本省督撫兩院嚴檄不許
過糴無非過慮為饑民計生全耳但督撫大老爺既愛
外省百姓尤愛本省百姓本道仰遵憲行自當安上全
下爾百姓須自己思筭家有幾口人每日吃多少糧食
計至麥熟時尚有多少日子足用則把多餘糧食糶賣
不足用則當自己畱着不可因目前價貴貪利亂賣不
可因一時急用前去後空今春麥子收成不知如何糧

食日少一日糧價日貴一日今日賤賣後日貴買非計也後日價貴糧盡本地無糧可買爾窮民將何以自全乎外省遠販之人皆富商大賈乘機射利非窮民自取也本道不便違憲禁糴又恐愚民失筭特行布告至於流來饑民多有手藝吾民有溫飽之家乘此修造屋宇量力興舉召募力作一舉兩得本地工匠擅稱舊主催霸住不令饑民做工者嚴拿究治又荒地甚多業主不能開墾有力之家報官竟行開墾官給印照開成之後

即為已業照例六年陞科原業主不得爭訟乘此流民甚多僱工甚賤儘力速速多開便為子孫世守恒產亦一舉兩得之事也又流寓饑民愿歸故土者願住本境者俱各聽從其便有力開荒者亦如前例無力願墾者向保甲長說明出具保結赴縣借貸牛種子粒本道與各屬一一措給開成之後照依定例六年起科永為已業倘欲還鄉任其轉賣如有原業主爭執者定即重懲痛處決無絲毫干累合行一并示諭

荒政叢書附錄上

欽定四庫全書

荒政叢書附錄下

湖廣布政司叅議俞森撰

捕蝗集要

一王禎農書言蝗不食芋桑與水中菱芡或言不食菜
豆豌豆豇豆大麻苘麻芝麻薯蕷吳遵路知蝗不食
豆苗廣收豌豆教民種植次年三四月民大獲其利
一飛蝗見樹木成行或旌旗森列每翔而不下農家多

用長竿挂紅白衣裙羣逐之亦不下也又畏金聲砲聲聞之遠舉鳥銃入鐵砂或稻米擊其前行前行驚奮後者隨之去矣

- 一用稈草灰石灰等分細末篩羅禾稻之上蝗即不食
- 一蝗最難死初生如蟻之時用竹作搭非惟擊之不死且易損壞宜用舊皮鞋底或草鞋舊鞋之類蹲地摑搭應手而斃且狹小不傷損苗種一張牛皮可裁數十枚散與甲頭復收之

一蝗在麥田禾稼深草中者每日侵晨盡聚草梢食露
體重不能飛躍宜用筭箕栲栳之屬左右抄掠傾入
布袋蒸焙泡煮隨便或掘坑焚火傾入其中若只瘞
埋隔宿多能穴地而出

一蝗有在光地者宜掘坑於前長濶為佳兩旁用板及
門扇接連八字擺列集衆發喊推門捍逐入坑又於
對坑用掃帚十數把見其跳躍而上者盡行掃入覆
以乾草發火焚之然其下終是不死須以土壓之過

宿方死

一燒蝗法掘一坑深廣約五尺長倍之下用乾茅草發
火正炎將袋中蝗傾入坑中一經火氣無能跳躍詩
云秉畀炎火是也

一捕蝗不可差官下鄉一行人從蠶食里正里正又只
取之民戶未見捕蝗之利先被捕蝗之擾蹂踐田舍
民不聊生然小民多愚愚者必惰非官督率不能踴
躍且必彼村此集合力驅捕一人惰則衆勤者皆阻

故必遣官董事惟以廉謹者充選

一附郭鄉村即印刷捕蝗法作手榜告示每米一升換蝗一斗不問婦人小兒携到即時交支如此則回環數十里內者可盡捕得蝗種一升者給米一升則捕蝗種者多後之生而為害者必少矣又萬曆四十四年御史過庭訓山東賑饑疏捕蝗男婦皆饑餓之人如一面捕蝗一面歸家喫飯未免稽遲時候遂向市上買現成麵做餅擔至有蝗去處不論遠近大小男

婦但能捉得蝗蟲與蝗子一升者換餅三十個又查得齒山隣近兩廠領糧饑民一千二百名可乘機撥用即傳告示云朝廷自去年十一月養爾等饑民使免於逃死當知報効今蝗蟲生發正爾等報効之日也自今以後能將近地蝗蟲或蟲子捕得半升者方給米麵一升為五日之糧如無不許准給

一嚴督保甲使知不可不捕然其要法只在不惜常平義倉穀米博換蝗蟲雖不驅之使捕而四遠自輻輳

矣倘或尅減邀勒則捕者氣阻

一元仁宗皇慶二年復申秋耕之令蓋秋耕之利掩陽
氣於地中蝗蝻遺種翻覆壞盡次年所種必盛於常
禾

一蝗災之時最盛於夏秋之間與百穀長養成熟之時
正相值也故為害最廣小民遇此乏絕最甚若二三
月蝗者是去歲之種蝗非蟄蝗也聞之老農言蝗初
生如粟米數日旋大如蠅能跳躍羣行是名為蝻又

數日即羣飛是名為蝗所止之處喙不停嚙又數日
孕子於地矣地下之子十八日復為蛹蛹復為蝗如
是傳生害之所以廣也秋月下子者則依附草木枵
然枯朽非能蟄藏過冬也然秋月下子者十有八九
而災於冬春者百止一二則三冬之候雨雪所摧損
滅者多矣其自四月以後而為災者皆本歲之初蝗
非遺種也故詳其所自生與其所自滅可得殄絕之
法矣

一蝗有蒸變而生者有延及而生者故蝗生之地必於
大澤之涯然洞庭彭蠡具區之旁終古無蝗也必也
驟盈驟涸之處如幽涿以南長淮以北青兗以西梁
宋以東諸郡之地湖澤廣衍曠溢無常謂之涸澤蝗
則生之故徐光啓以為蝦子江以南多大水而無蝗
蓋湖澤積滯水草生之南方水草農家多取以壅田
就不其然而湖水常盈草恒在水蝦子附之則復為
蝦而已北方之湖盈則四溢草隨水上迫其既涸草

留涯際蝦子附於草間既不得水春夏鬱蒸乘濕熱之氣變為蝗蝻其勢然也故知蝗生於蝦蝦子之為蝗則因於水草之積也故宜令凡地方有湖蕩洶窪積水之處遇霜降水落之後即親臨勘視本年潦水所至到今水涯有水草存積即多集夫衆侵水芟刈斂置高處風戾日曝待其乾燥以供薪燎如不堪用就地焚燒務求淨盡春夏之月居民於湖洶中捕得子蝦一石減蝗百石乾蝦一石減蝗千石但令民通

知此理當自為之不煩告戒矣光啓又言見傍湖居
民言蝗初生時最易撲治宿昔變異便成蝻子散漫
跳躍勢不可遏治之者宜於每年十月州縣官巡視
境內有蝗蟲遺子之地多方設法除之蓋蝗蟲遺子
必擇堅垆黑土高亢之處用尾栽入土中下子深不
及一寸仍畱孔竅且同生而羣飛羣食其下子必同
時同地勢如蜂窠易尋覓也一蝗所下十餘形如豆
粒中止白汁漸次充實因而分顆一粒中即有細子

百餘或云一生九十九子不然也夏月之子易成八月內遇雨則爛壞否則至十八日生蛹矣冬月之子難成至春而後生蛹故遇臘雪春雨則爛壞不成亦非能入地千尺也此種傳生一石可至千石故冬月掘除尤為急務且農力方閑可以從容搜索官司即以數石粟易一石子猶不足惜第得子有難易受粟宜有等差且念其衝冒嚴寒尤應厚給使民樂趨其事可矣

一捕蝗宜重其事嚴其法昔宋淳熙勅諸蟲蝗初生若飛落地主鄰人隱蔽不言耆保不即時申舉撲除者各杖一百許人告報當職官承報不受理及受理而不即親臨撲除或撲除未盡而妄申盡淨者各加二等諸官司荒田牧地經飛蝗住落處令佐應差募人取掘蟲子而取不盡因致次年生發者杖一百諸蝗蟲生發飛落及遺子而撲掘不盡致再生發者地主耆保各杖一百諸給散捕取蟲蝗穀而減尅者論如

吏人鄉書手攬納稅受乞財物法諸係工人因撲掘
蟲蝗乞取人戶財物者論如重祿工人因職受乞法
諸令佐遇有蟲蝗生發雖已差出而不離本界者若
緣蟲蝗論罪并在任法又詔因穿掘打撲損苗種者
除其稅仍計價官給地主錢數毋過一項此外復有
二法一曰以粟易蝗晉天福七年命百姓捕蝗一斗
以粟一斗償之此類是也一曰食蝗唐貞元元年夏
蝗民蒸蝗暴乾颺去翅足而食之如此則蝗雖遺種

不致發生即發生或延及亦不患蔓延矣



荒政叢書附錄下